

清

史

稿

清史稿

列傳二十二

圖賴

準塔

伊爾德

努山

阿濟格尼堪

佟圖賴

圖賴費英東第七子也初隸廂黃旗後與兄納蓋弟蘇完顏改屬正黃旗天聰元年太宗伐明略寧遠二年伐察哈爾圖賴皆從三年復伐明薄明都明大同總兵滿桂入援屯德勝門圖賴與戰所殺傷甚衆師還授世職備禦四年從貝勒阿敏守永平明兵救灤州阿敏遣巴都禮赴援圖賴及梅勒額眞阿山皆在行及阿敏棄永平出邊明將率步卒百人追擊圖賴以十六人殿還戰盡殲之進世職游擊五年上伐明圍大凌河城命巴牙喇囊章京揚善鞏阿岱等駐軍壕外待敵度壕即與戰而令圖賴與南褚哈克薩哈富兩旗間衛樵採城兵出挑戰圖賴銳入陳達爾漢以所部繼貝勒多爾袞亦督兵進我師薄壕舍騎步戰敵阻壕與城上兵爭發礮矢師退副將穆克譚屯布祿備禦多貝戈里等皆

戰死圖賴亦被創上怒曰圖賴輕進諸軍從之入朕弟亦衝鋒而進有不測將
磔爾等食之敵如狐處穴更將焉往朕兵天所授皇考所遺欲善用之勿使勞
苦穆克譚我舊臣死非其地豈不可惜因誡諸臣毋視圖賴創揚古利鞏阿岱
偕往存問上復切責之明監軍道張春等以四萬人來援次長山上率諸貝勒
禦之圖賴當右翼躍馬突陳敵潰走遂覆其師七年從攻旅順口八年從伐明
徇大同攻朔州拔靈邱進世職二等旋追論攻朔州時越界出略又不赴期會
地奪俘獲入官九年授巴牙喇章京從貝勒多鐸等伐明多鐸既入廣寧令
圖賴與固山額真阿山等以四百人爲前鋒向錦州擊殺明將劉應選破其軍
師還以功得優資崇德二年授議政大臣三年上命睿親王多爾袞貝勒岳託
率師分道伐明圖賴從岳託爲前驅踰牆子嶺入邊克十一臺遂南略山東明
將以八千人拒戰蒙古阿藍泰旁卻圖賴方督所部馳擊敵百騎突至圖賴搏
戰陷堅敵敗去明大學士劉宇亮綴我師而北至通州圖賴與固山額真譚泰
擊破之拔四城進三等梅勒章京六年從鄭親王濟爾哈朗等伐明圍錦州明

總兵祖大壽爲明守蒙古吳巴什諾木齊等謀內應事洩大壽以兵攻吳巴什等圖賴入其郭力戰援諾木齊出先後破杏山松山援兵遂督烏真超哈拔塔山杏山二城進一等梅勒章京師還追論攻錦州時巴牙喇兵有怯退者圖賴當罰鍰上命寬之八年從伐明拔中後所前屯衛進三等昂邦章京順治元年從睿親王多爾袞帥師伐明明將吳三桂迎師四月戊寅師距山海關十里李自成遣其將唐通率數百騎出關是夕遇於一片石圖賴督巴牙喇兵與戰通敗走己卯入關從大軍擊破自成自成還京師西遁圖賴復從諸軍追擊敗之於慶都二年叙功超授三等公時圖賴方從定國大將軍豫親王多鐸西討自成豫親王師自懷慶而南圖賴至孟津率精兵渡河明守將黃士欣等皆走降瀕河寨堡十五明總兵許定國等以所部來附進薄潼關自成將劉宗閔據山爲陳拒我師噶布什賢章努山鄂碩等率兵向敵敵迎戰圖賴率百四十騎直前掩殺一以當百俘馘過半是歲正月自成將劉芳亮以千餘人出關覘我師圖賴與阿濟格尼堪等令正黃正紅廂白廂紅廂藍等五旗各牛象出巴牙

喇兵率以擊敵大敗之自成聞敗親率馬步兵拒戰又徵廂黃正藍正白三旗兵相助賊連夕攻我壘皆敗走遂破潼關陝西既定豫親王移師下江南四月至揚州令圖賴與拜音圖阿山等攻之克其城執明大學士史可法殺之進攻明南京復令圖賴與拜音圖阿山率舟師列江西岸助攻南京既下從貝勒尼堪等逐明福王至蕪湖福王登舟將渡江圖賴扼江斷渡明將田雄馬得功以福王降師還圖賴上書攝政睿親王略言圖賴昔年事太宗王之所知也今圖賴事上亦猶昔事太宗時不避諸王貝勒嫌怨見有異心不爲容默大臣以下牛彘章京以上亦不爲隱惡圖賴誓於天必盡忠事上圖賴有過失王若不言恐不免於罪戾王幸毋姑息不我教誡也初圖賴在軍固山額眞譚泰方從英親王阿濟格西征遣使告圖賴曰我軍道迂險故後至請留南京畀我軍取之圖賴以其語告豫親王別作書遣塞爾特報索尼將使索尼啓攝政王塞爾特以書示牛彘希思翰希思翰慮書達譚泰且得罪令沉諸河圖賴至京師繫塞爾特案前書塞爾特詭言已達索尼事聞於攝政王三年正月下諸大臣審勘

將罪索尼攝政王親勒塞爾特始自承沈書狀攝政王坐午門議譚泰罪三日猶未決圖賴詰王語甚厲攝政王怒曰爾亦過安矣曩逐流賊至慶都議分道進兵因諸將爭先爾請讓蕭豫英諸親王不顧而睡今又以語凌我似此怒色疾聲將逞威於誰乎予與諸王非先帝子弟乎語畢遂還邸諸王因執圖賴將罪之王復返曰圖賴雖聲色過厲然非退有後言者且爲我矢勤効忠無他咎也命解其縛獄既定侍衛阿里馬私誚圖賴庇索尼圖賴以告攝政王王令捕阿里馬及其二弟索尼岱鎖寧阿里馬故驍勇與索尼岱拔刀力拒皆殺之而釋鎖寧阿尋授本旗固山額真二月以貝勒博洛爲征南大將軍圖賴副之師徇浙江福建五月論破流賊及定河南江南功進圖賴一等公是月師至杭州明魯王駐紹興其將方國安等屯錢塘江東岸綿亘二百里艤舟拒我軍我軍舟未具會潮落沙漲圖賴率諸將士策馬自上流逕渡江廣十餘里人馬無溺者國安望見驚棄戰艦走還紹興將劫魯王以降魯王走台州圖賴師從之獲其將武景科等進克金華殺明督師大學士朱大典七月復進克衢州殺明

蜀王盛濃及明將吳凱項鳴斯等浙江平八月博洛令諸軍分道入福建圖賴
自衢州山仙霞關擊破明大學士黃鳴駿等師度嶺克浦城分遣署巴牙喇
章京杜爾德噶布什賢章京拜尹岱等攻克建寧延平諸府明唐王自延平走
汀州復遣巴牙喇章京阿濟格尼堪杜爾德等帥師追擊克其城執唐王及
其宗室諸王送福州明將姜正希以二萬人夜襲汀州已登陴我軍出禦擊殺
過半別軍自廣信出分水關克崇安共撫定興化漳州泉州諸府福建平師還
至金華圖賴卒於軍子輝塞襲爵貝子屯齊等訐鄭親王濟爾哈朗因及圖賴
嘗謀立肅親王豪格及上卽位復附和鄭親王輝塞坐奪爵八年上親政念圖
賴舊功命配享太廟諡昭勳立碑紀績輝塞復襲爵雍正九年三月定封一等
雄勇公

準塔滿洲正白旗人扈爾漢第四子也天聰間授世職牛錄章京官甲喇額真
嘗與熬拜共率師略明錦州復與勞薩共率師迎護察哈爾來降諸宰桑崇德
二年四月從武英郡王阿濟格攻明皮島敵守堅阿濟格集諸將問策準塔與

熬拜對曰我二人誓必克之不克不復見王遂先衆連舟渡海舉火招諸軍敵倚堡爲陳以拒與熬拜犯矢石力戰卒取其烏論功進世職三等梅勒章京襲十二次賜號巴圖魯敕增紀其績三年八月授蒙古固山額眞九月從揚武大將軍貝勒岳託等伐明攻密雲牆子嶺準塔先據嶺導諸軍毀邊牆以入擊敗明太監馮永盛總兵侯世祿等又與武賴敗三屯營援兵復進戰於董家口破敵行略地克城二師還進世職二等梅勒章京六年二月從睿親王多爾袞攻錦州以阿王指遣士卒歸又離城遠駐議罪當奪官籍沒上命爵綏以贖八月上自將攻錦州九月還盛京命準塔從貝勒杜度等爲長圍困之七年三月錦州既下上命貝勒阿巴泰率師留成旋令準塔與固山額眞葉臣等番代先是圍錦州時城兵出犯廂黃旗汛地巴牙喇兵退入壕內王貝勒等袒不舉準塔坐阿附議罪當罰綏上命貸之十月從阿巴泰圍爾格師伐明略山東與葉克書等分兵攻孟家臺不克士卒有死者準塔又妄稱嘗陷陳師還議罪奪巴圖魯號降世職一等甲喇章京仍罰綏十二月復命鎮錦州順治元年從睿親

王多爾袞入關擊李自成遂至慶都大破之又與譚泰等率噶布什賢兵遂至真定又破之自成焚輜重倉皇西走於是京師以北居庸關內外諸城堡及畿南諸州縣悉定論功復三等梅勒章京二年正月以饒餘郡王阿巴泰爲帥準塔將左翼譚布將右翼帥師徇山東二月間明福王遣兵渡河阿巴泰令準塔等迎戰明兵方攻沛縣李家樓馬步二十餘屯徐州距城十五里準塔師破其壘斬其將六明兵赴河死者無算遂克徐州五月復自徐州南下明總兵劉澤清遣其將高佑以舟師攻宿遷擊破之進次清河縣黃河自西來至縣境淮水及清河皆入焉澤清遣其將馬化豹張忠義等將兵四萬舟千餘據三水交匯處連營十里準塔遣梅勒章京康喀賴游擊范炳吉天相等率兵渡清河結營相拒發礮擊敵舟復遣都司楚進功將步兵六百人屯黃河北岸鳴礮相應又分其兵爲二一出清紅上游一隔水擊破明馬步軍兵復合逐入淮安界斬其將三師次清江浦澤清引去明將吏柏永馥范鳴珂出降遂克淮安明新昌王入海據雲臺山糾衆陷興化準塔遣將擊斬之通州如皋泰興諸城皆下鳳陽

廬州亦降。降明將吏二百十三，得舟五百餘，馬九百餘，橐駝二十五，礮一百二十。捷聞，進準塔三等昂邦章京。復巴圖魯，命以固山額真領守廬、鳳、淮、陽諸處。準塔帥師巡行諸州縣，安撫居民，設置官吏。江淮間悉定，澤、清、尋亦以所部降。三年正月，從肅親王豪格帥師徇陝西。時叛將賀珍據漢中，武大定、石國璽等分屯徽、隋諸州，遙與相應。豪格帥自西安向漢中，珍走西鄉。七月，令準塔與貝子滿達海等攻大定、國璽等。大定、國璽等以其衆七百人降。十一月，豪格擊張獻忠於西充，準塔指揮諸軍合戰，俘虜甚衆。四年八月，復與貝勒尼堪貝子滿達海等分兵下遵義、夔州、茂州、榮昌、富順、內江、資陽諸郡縣。四川平，師還。尋卒，論功進世職一等精奇尼哈番。十二年，追諡襄毅，立碑紀績。準塔無子，弟阿拉密襲。遇恩詔進三等伯。康熙中，準塔兄子舒書降，襲一等精奇尼哈番。乾隆初，定封一等子。

伊爾德滿洲正黃旗人，揚古利族姪也。天聰三年，從揚古利率師入明邊，略錦州。甯遠既復，從攻北京，師還，敗山海關，援兵於灤州，出塞爲前驅，斬明兵守隘。

者五年從上圍大凌河城城兵突出伊爾德衝鋒殺敵逐敵迫城乃引還敵騎挾弓矢將犯御營伊爾德馳斬之秋復略前屯衛將十五人捕敵軍邏卒值別將噶思哈爲敵困奮擊援之出積功授世職備禦尋擢巴牙喇章京崇德二年從貝勒阿巴泰築都爾弼城將巴牙喇兵四百人護工役五年從圍錦州敵出戰伊爾德領難追擊敗之督屯田錦州松山間明人縱牧於野伊爾德設伏烏欣河驅其牲畜以歸敵襲我軍後伊爾德還擊斬獲無算超進世職三等梅勒章京屢坐事當削世職命罰鍰以贖七年復從圍錦州明兵來奪敵擊敗之進一等順治元年命駐防錦州二年加牛簡前程世祖召伊爾德命從豫親王多鐸南征與尙書宗室謹岱等將蒙古兵自南陽下歸德招撫甚衆至揚州獲戰艦百餘渡江先驅破南京明福王由崧走蕪湖與固山額真阿哈尼堪等追擊敗明將黃得功三年進世職一等昂邦章京六年偕大將軍譚泰討叛將金聲桓下南昌誅聲桓師進叛將李成棟陷信豐攻克之成棟夜遁馬蹶溺水死分兵定撫州建昌破其將楊奇盛江西悉平師還復移勦保定土寇論功進世

職一等精奇尼哈番八年巴牙喇薩章京鼐拜許伊爾德值上幸內苑擅令門直員役吏番私減守門護軍額數又嫉忌熬拜等鞫實論死上貸之命降世職一級削級以贖尋授本旗固山額真九年三遇恩詔累進一等伯兼拖沙喇哈番從敬謹親王尼堪征湖南師敗績王沒於陳十一年師還論罪奪職籍沒初明魯王以海與其將阮進等據舟山以海走入海至是其將陳六御阮思等復據舟山爲寇十二年上授伊爾德甯海大將軍率師討之六御等遁所置總兵王長樹毛光祚沈爾序等登陸掠大嵐山伊爾德遣巴牙喇薩額真車爾布梅勒額真碩祿古總兵張承恩引兵趨夏關抵斗門連擊敗之斬長樹等而自率師攻甯波乘舟趨定海分三道並進六御等列舟望江口山下以待伊爾德揮衆進擊敗之追至衡水洋斬六御等遂取舟山十四年師還上命貝勒杜蘭等郊勞復世職論功進一等伯十五年從信郡王多尼南征自貴陽至盤江擊斬明將進克雲南十八年卒於軍諡襄敏孫巴璉岱襲自散秩大臣遷正黃旗滿洲都統夏逢龍之亂出爲荊州將軍聖祖征噶爾丹參贊大將軍馬斯喀軍務

卒諡恪恭子馬哈達降二等伯世襲乾隆中加封號宣義

努山扎庫塔氏世居鄂里父塔克都歸太祖太祖命籍其衆爲牛彖以其長子瑚什屯爲牛彖額眞旗制定隸滿洲正黃旗積功授世職游擊卒無子以努山子渾岱爲後襲職而努山代爲牛彖額眞從征伐輒先驅覘敵有功授噶布什賢章京太宗嘉其能以瑚什屯世職改命努山諡曰弟之子不若弟親也時爲天聰八年五月尋從伐明攻大同努山與甲喇額眞席特庫納海執邏卒以獻崇德元年率甲士行邊至冷口遇明邏卒十四斬三人俘一人獲馬十餘三年從貝勒岳託伐明將入邊遇明兵斬四十人俘三人發明兵所置火藥度牆子嶺明總兵吳阿衡將六千人迎戰擊之敗與噶布什賢噶喇依昂邦勞薩逐明兵獲馬數十及攻具薄明都破明兵爲伏者而自設伏道側挑明太監高起潛戰伏起夾擊多所俘馘即夕起潛襲噶布什賢兵努山與席特庫及甲喇額眞鄂克合兵戰起潛兵敗走逐北迫會通河明兵多入水死遂次涿州分道從睿親王多爾袞徇山東克濟南師還出塞復與勞薩共敗明兵六年七月與侍衛

穆章等調敵董家口喜峯口遇明兵斬百餘人俘四人從圍錦州是時上自將駐軍松山杏山道中明兵擊噶布什賢兵努山力戰斬五十二人獲馬三十明總督洪承疇出戰努山與勞薩等陳而前戰良久王貝勒等各以所部合戰大破明兵十月擢噶布什賢噶喇依昂邦是時武英郡王阿濟格駐軍杏山河岸上命努山濟師敵騎千自寧遠至猝與努山值驚潰努山逐之至連山斬二十人獲馬三十有二七年三月與噶布什賢噶喇依昂邦吳拜共略寧遠敵騎五十自中後所至率噶布什賢兵縱擊明兵四百人來援并擊敗之薄寧遠守者背城陣努山等與戰俘二十三人進世職二等甲喇章京八年上以貝勒阿巴泰等略山東未還命努山率甲喇額真四侍衛四兵九十至界口嶺調師行距邊遠近遇明兵斬守備一兵三百餘俘數十人獲馬騾二百餘八月與巴牙喇穆章京阿濟格尼堪帥師成錦州順治元年世祖既定鼎命努山將左翼噶布什賢兵從豫親王多鐸西討李自成自成兵出潼關拒戰努山自問道劇其壘斬殺過半自成兵潰走二年移師定河南下揚州克明南京明福王由松走蕪

湖努山與諸將以師從之得福王以歸三年從貝勒博洛徇浙江明總兵方國安屯錢塘江東岸以舟師出戰努山從固山額真圖賴自上游渡擊國安敗之盡得其舟進略福建擊斬明巡撫楊廷清李隨芳時巴牙喇囊章京都爾德等攻下建寧延平諸府明唐王聿鍵走汀州努山馳七晝夜追及之唐王入城守令銳卒以巨木撞其門後軍繼至遂克之五年從鄭親王濟爾哈朗定湖廣明桂王由榔據廣西其總督何騰蛟總兵王進才馬進忠袁宗第等分屯湖南諸郡邑六年正月努山至長沙時席特庫亦遷噶布什賢噶喇依昂邦將右翼噶布什賢兵共簡精銳攻湘潭與固山額真阿濟格尼堪等破北門入騰蛟死之四月兵部尙書阿哈尼堪等徇寶慶未至七十里進才進忠合軍出禦努山令所部舍騎步戰明兵敗薄城東門進才等棄城走逐之至武岡殲進忠所將步兵三千破進才及宗第等寨十餘分克沅州靖州再進克全州斬明閣部楊鰲及副將以下四十餘累進二等阿思哈尼哈番十三年擢內大臣十五年卒阿濟格尼堪滿洲正白旗人達音布子達音布戰死長子阿哈尼堪襲三等甲

喇章京旋卒阿濟格尼堪繼襲授甲喇額真從太宗伐察哈爾自大同入明境與雅賴共擊敗明兵於崞縣崇德元年從太宗伐朝鮮擊敗明甯遠守邊兵三年從貝勒岳託伐明擊破總兵侯世祿得其印及騎四年擢巴牙喇章京從肅親王豪格攻錦州設伏於連山俘五人獲馬七六年從鄭親王濟爾哈朗攻錦州以七十人爲伏敗敵進攻杏山領叢直入敵壘敵大潰時錦州有蒙古諾木齊等願降明總兵祖大壽發其謀以兵圍之不得出阿濟格尼堪謂知之乘夜薄城力戰先登入其郭援諾木齊等皆出進攻松山戰屢捷上以阿濟格尼堪少年能殺敵進一等參將賚白金四百是年八月明總督洪承疇集諸鎮兵救錦州上自將屯松山杏山道中絕饗道明總兵吳三桂唐通等皆潛引去上召阿濟格尼堪親授策與熬拜等追擊大敗之八年八月命戍錦州九月鄭親王取中後所前屯衛阿濟格尼堪率所部及蒙古兵攻中前所拔其城俘明潰兵無得脫者加半個前程順治元年四月從睿親王多爾袞入關破李自成追至慶都進一等梅勒章京十月從豫親王多鐸帥師西討自成渡孟津薄潼關

賊鑿重壕爲固自成將劉方亮率千餘人出拒阿濟格尼堪與圖賴阿爾津等
奮戰方亮敗退至夜復來犯阿濟格尼堪力戰卻之連破賊二壘遂麾兵踰濠
冒矢石先登賊驚潰降竄師入關二年正月克西安自成自商州入湖廣豫親
王移師下江南四月至淮安遣阿濟格尼堪率所部趨揚州屯城北與親軍合
攻城遂下獲戰艦二百餘渡江克明南都追擊明福王由松於蕪湖敗其舟師
進三等昂邦章京三年從端重親王博洛定浙江徇金華衢州破仙霞關略建
寧延平明唐王聿鍵走汀州阿濟格尼堪與都爾德進擊至城下率精銳先登
遂克汀州其總兵姜正希以二萬人赴援阿濟格尼堪出禦所殺傷過半進一
等精奇尼哈番賜勅世襲五年授正白旗滿洲都統六年鄭親王濟爾哈朗征
湖廣以阿濟格尼堪參贊軍事是時明總督何騰蛟總兵王進才馬進忠等守
湖南騰蛟軍湘潭進才進忠軍寶慶阿濟格尼堪至長沙與兵部尙書阿哈尼
堪爲前鋒攻湘潭破北門入執騰蛟逐明潰兵至湘鄉盡殲之遂趨寶慶未至
七十里進才進忠合軍拒戰阿濟格尼堪令步騎番進薄寶慶東郭進才等敗

通遂下沉靖進克全州七年正月師還進三等伯賚白金五百授議政大臣四月卒諡勇敏乾隆間加封號襄寧子宜理布自有傳

佟圖賴漢軍鎮黃旗人父養眞太祖克撫順養眞以從弟養性已降挈其族來歸從攻遼陽以功授世職游擊命駐鎮江守將陳良策以城叛養眞及長子豐年皆死佟圖賴初名盛年其次子也襲世職事太宗天聰五年從攻大凌河破明監軍道張春兵進世職二等參將崇德三年授兵部右參政五年從攻錦州取白官兒屯台六年復從攻錦州取金塔口三台七年從攻松山明師以騎兵突陳將奪我師曠佟圖賴擊卻之又敗其步兵取塔山杏山諸台遂克其城二以功進世職一等是歲始分漢軍爲八旗授正藍旗固山額眞師出略明邊佟圖賴與固山額眞李國翰等奏請直取燕京上以未取關外四城何能卽克山海優旨開諭之八年從鄭親王濟爾哈朗收前屯衛中後所二城加半箇前程順治元年從入關調鎮白旗與固山額眞巴哈納石廷柱等招降山東府四州七縣三十二復移師下太原招降山西府九州二十七縣一百四十一師還賜

白金四百尋從豫親王多鐸西討李自成定河南二年移師徇江南先後克揚州嘉興皆在行進世職二等梅勒章京賜蟒服黃金三十白金千五百五年授定南將軍與固山額真劉之源率左翼漢軍駐寶慶時馬進忠等寇衡湘辰永間陷寶慶修圖賴師至克之六年鄭親王濟爾哈朗徇湖廣修圖賴與固山額真碩詹等分兵趨衡州陳斬明將陶養用拔其城時明將胡一清猶屯城南爲七營乘勝疾擊破之遂一清戰於望公嶺山峪口又破之一清走入廣西境距全州三十里立六營自保與努山阿濟格尼堪合軍奮擊破之遂下全州師還駐衡州明兵犯常甯遣牛彖額真陳天謨等馳援破明兵石鼓洞斬其渠八年師還宴勞授禮部侍郎復調正藍旗固山額真世職累進至三等精奇尼哈番十三年以疾乞休世祖命加太子太保致仕十五年卒賜祭葬贈少保仍兼太子太保諡勤襄康熙間以孝康章皇后推恩所生贈一等公並命改隸滿洲世宗卽位追封修養正一等公諡忠烈與修圖賴並加太師養真改曰養正避世宗嫌名也

論曰圖賴忠鯁類父督師南征破福唐二王三江閩浙以次底定仍世侑饗允
哉準塔綏徠畿輔戡定江淮伊爾德橫海殺敵破魯王餘衆功與相並努山阿
濟格尼堪修圖賴佐定江表又合軍徇湘南戮力佐創業績亦偉矣

陳泰

阿爾津

李國翰

字師範 歸化城人

卓布泰

烏魯木齊人

卓羅

四子 烏魯木齊人

愛星阿

子 烏魯木齊人

遜塔

子 烏魯木齊人

陳泰滿洲鎮黃旗人額亦都孫徹爾格子也初授巴牙喇甲喇章京從伐明攻錦州明兵自寧遠來援陳泰先衆直入敵陳斬執纜者得纜以歸天聰三年從太宗伐明薄明都屯德勝門外攻袁崇煥壘遇伏奮擊多所俘馘五年從圍大凌河城明監軍道張春赴援陳泰設伏禽其邏卒復以步軍戰殲敵崇德元年從伐朝鮮與梅勒額眞薩穆什喀夜襲破黃州守將營三年伐明敗明兵於豐潤攻太監馮永盛總兵侯世祿管援之又以巴牙喇兵三十敗明騎卒百餘五年從圍錦州攻杏山敗敵兵獲牲畜六年復圍錦州敗松山兵我兵出樵採爲敵困陳泰率兵六援之出敵襲我後隊迭戰破敵遂克其郭予世職自牛錄章

京進二等甲喇章京七年復圍錦州掘塹困松山明兵夜犯正黃旗蒙古營赴
援擊之走八年從伐明敗總兵馬科於渾河築浮橋濟師明總督范志完拒戰
擊敗之下山東陳泰以偏師克東河汶上甯陽三縣進世職二等順治元年從
入關擊破李自成進世職一等四年授禮部侍郎從平南大將軍孔有德征湖
廣戰荊州擊破流賊一隻虎時明魯王遣其將鄭彩阮進等寇福建先後陷府
三州一縣二十七上授陳泰靖南將軍與梅勒額真棟阿賚率師討之擊破魯
王將曹大鎬張耀星克同安平和二縣五年三月復克興化彩遁入海復克長
樂連江獲所置總督顧世臣等十一人斬之魯王所陷諸府州縣以次盡復福
建平師還授巴牙喇章京進二等阿思哈尼哈番遇恩詔累進三等精奇尼
哈番兼拜他喇布勒哈番遷刑部尙書八年移吏部尙書授國史院大學士以
加上皇太后尊號恩詔誤增赦款罷任並以吏部恩詔陞襲過濫降世職一等
阿達哈哈番九年起禮部尙書充會試主考官授鎮黃旗滿洲固山額真特命
進世職二等精奇尼哈番十年上以湖廣未定大學士洪承疇再出經略至軍

疏言孫可望等戰湖南郝搖旗一隻虎等擾湖北湖南駐重兵各郡驚遠不免首尾難顧上授陳泰定南靖寇大將軍與固山額真藍拜濟席哈巴牙喇靈章京蘇克薩哈等統兵鎮湖南臨行上諭之曰師行有一定紀律大小將佐爲國盡力豈致挫折上母親視主帥下當撫勵士卒能愛衆而得其心遇敵未有不爭先效命者也十一年復授吏部尙書十二年孫可望遣其將劉文秀盧明臣馮雙禮等以舟師六萬分犯岳州武昌文秀引精兵攻常德陳泰遣蘇克薩哈設伏以待甲喇額真呼尼牙羅和當前鋒挫敵甲喇額真蘇拜希福等以舟師迎擊大軍繼進三合三勝敵復列艦拒戰伏起縱火焚其舟敵大敗別遣兵擊敵德山下師進次龍陽敵集二千人來犯我兵奮擊潰奔明臣赴水死雙禮被創與文秀并遁降所置裨將四十餘兵三千餘論功進一等精奇尼哈番兼拖沙喇哈番未幾卒於軍師還明年正月世祖宴諸將追悼陳泰揮淚酌酒諭學士麻勒吉侍衛覺羅塔大曰大將軍班師還朕將親酌酒以慰勞之不幸中道棄捐不復相見爾等以此觴奠大將軍靈次抒朕追悼諸將及侍從皆感涕賜

祭葬諡忠襄乾隆初定封一等子

阿爾津伊爾根覺羅氏父高瑪塔與從子阿山歸太祖官侍衛旗制定與阿山同隸正藍旗阿山自有傳阿爾津積戰功授甲喇額真世職二等參將天聰四年從固山額真納穆泰等守灤州納穆泰等引還論罪上以阿爾津力戰殺敵特賞之九年伐察哈爾阿爾津從貝勒岳託駐歸化城博碩克圖汗子陰結喀爾喀等部貳於明阿爾津獲其使者進世職一等甲喇章京崇德元年上自將伐朝鮮朝鮮國王李倬走南漢山城阿爾津簡精騎追躡破其援兵二年略鐵山獲明邏卒授議政大臣領巴牙喇叢章京三年從豫親王多鐸伐明過中後所明將祖壽發兵追襲阿爾津爲殿戰不力所部多戰死者又棄其骨不收坐削世職籍家產之半仍領巴牙喇叢章京如故五年從圍錦州以離城遠駐坐罰綏六年攻松山擊明總督洪承疇軍克臺一壘三殲守臺敵兵出我師被圍者上嘉其善戰復授三等甲喇章京七年從伐明攻寧遠八年與巴牙喇叢章京哈寧阿等伐虎爾哈部下七屯俘獲無算順治元年從入關擊李自成追

及於安肅大破之進二等甲喇章京兼牛個前程尋從豫親王多鐸西破潼關
還定江南進三等梅勒章京三年與巴牙喇繼章京熬拜等徇淡中擊叛將賀
珍破流賊張獻忠進攻叙州所向克捷五年進一等阿思哈尼哈番尋率師定
宣化叛兵八年與固山額真克青等發武英親王阿濟格罪狀語詳阿濟格傳
敘功遇恩詔進一等精奇尼哈番兼拖沙喇哈番九年授西安將軍鎮漢中尋
改授定南將軍移師徇湖廣十一年自巴牙喇繼章京遷固山額真十二年八
月授寧南靖寇大將軍與固山額真卓羅等率師駐荊州時土寇姚黃等據歸
州出沒宜昌襄陽間阿爾津督兵搜捕安集兵民枝江松滋諸縣悉定十三年
與卓羅等率師渡江十月克辰州寶慶永順諸土司率官吏具版籍詣軍前降
時雲南貴州尙爲明守阿爾津議移常德鎮兵守辰州別移兵屯常德爲應援
自辰州下沅靖進取滇黔經略大學士洪承疇與異議事聞上召阿爾津還京
師以宗室羅託代之十五年正月授信郡王多尼爲安遠靖寇大將軍征雲南
命阿爾津率本族兵以從五月卒於軍贈太子太保諡端果乾隆初定封三等

子

李國翰漢軍鎮藍旗人其先居清河父繼學初爲商從明經略楊鎬軍管通使於我天命六年克遼陽繼學來歸授都司以副將劉興祚焚賄劾罷之屢獲明諜捕逃人授世職三等副將請老國翰襲世職事太宗授侍衛賜號墨爾根侍衛天聰三年從伐明薄明都還攻永平戰先衆五年圍大凌河城兵突出國翰督兵擊之退明兵自錦州赴援又擊之敗走九年以善拊循所領人戶進世職二等梅勒章京崇德三年授刑部理事官從伐明入邊明兵千餘據山列陳國翰督兵奮擊敗之獲馬四十進克牆子嶺轉戰至山東克濟南師還攻慶都獲鹿發礮毀其垣四年授鎮藍旗漢軍梅勒額眞五年從攻錦州克呂洪山臺七年攻下塔山杏山擢鎮藍旗漢軍固山額眞八年從克前屯衛中後所世職累進三等昂邦章京順治元年從入關國翰與固山額眞劉之源祖澤潤等率兵勦饒陽土寇康文斗郭壯畿等師進征山西時李自成走陝西其黨猶分據太原平陽諸府國翰與固山額眞葉臣謀曰自成新敗賊無固志當以大兵直搗

太原太原既下分道略定諸郡縣餘賊非降卽就馘耳乃合兵進拔太原分道略定諸郡縣師還賚白金五百尋又從大將軍英親王阿濟格征陝西自成走湖廣師從之戰應山進攻武昌與固山額眞全礪等奪舟數百二年命偕固山額眞巴顏率兵下四川次西安叛將賀珍自漢中來犯國翰與駐防西安內大臣和洛輝分兵夾擊大破之進世職二等三年大將軍肅親王豪格師至令國翰與巴顏逐捕延安餘寇寇保張果老崖掘壕困之乘夜攻克其寨殲其渠獲馬二百餘遂從肅親王下四川殲張獻忠復率兵渡涪江擊破獻忠將袁翰進世職一等五年四月授定西將軍同平西王吳三桂鎮漢中六年明宗室朱森溘與其將趙榮貴以萬餘人犯階州國翰督兵赴援戰必先衆陷陳諸將請曰將軍任討賊之重奈何輕身犯鋒鋒脫有不戒憂及全軍國翰曰吾固知此然賊鋒頗銳戰不利勢將蔓延吾故以力戰挫其鋒明之失機率由主兵者怯戰耗時賊以坐大覆轍可復蹈耶遂戰陳斬森溘榮貴復擊破其將王永強斬級數千獲駝馬數百復宜君同官蒲城宜川安塞清澗等縣上深嘉其勇略諭以

自後但發縱指示不必身先士卒叛將姜瓖據大同其將劉登樓張鳳翼任一
賞謝汝德萬鍊等分據附近諸郡縣國翰遣兵會勦殲賊甚衆撫定河東進克
府谷擒斬所置經略高有才以下三百餘人降其將郝自德等進一等伯九年
與三桂督兵復成都嘉定遣將徇重慶敘州皆下明將王復臣等糾猱獍萬餘
人犯保甯列象陳攻城國翰自緜州赴援督兵橫擊敵陳斬復臣殲其衆捷聞
進三等侯紫貂冠服鍍金甲冑夔韃鞍馬十年以四川平命與三桂還鎮漢中
十四年明將譚文等與自成餘黨劉二虎等爲寇陷重慶使所置督都督杜子
香守之十五年國翰與三桂進討之自西充下合州子香迎戰敗遁復重慶道
桐梓趨遵義明將李定國遣其將劉正國等據險拒戰擊之潰自水西走雲南
取遵義及所屬州縣復進克開州並招降水西土司時大將軍羅託經略洪承
疇已取貴陽國翰還駐遵義策會師取雲南七月卒於軍喪至京命內大臣致
奠贈太子太保諡敏壯侯爵襲三次循例改襲三等伯乾隆中加封號懋烈海
爾圖國翰長子初從國翰軍擊賀珍破袁韜皆在行授兵部理事官牛榮額貢

擢鎮藍旗漢軍梅勒額真授戶部侍郎坐事罷遼本旗固山額真康熙初襲三等侯爵定西將軍貝勒董鄂討叛將王輔臣命海爾圖運礮赴軍前並參贊軍務尋以連砲遲誤解參贊留駐鳳翔從征雲貴二十年卒於軍桑額國翰第三子康熙初自參領擢甯夏總兵遷雲南提督未上官吳三桂反留駐荊州改湖廣提督移守武昌從攻岳州師進城陵磯發礮沈敵艦加右都督三桂兵自洞庭湖出桑額擊之卻遂至岳州城下三桂兵引去收萬容石首安鄉諸縣加左都督詔趣進師復以桑額爲雲南提督奏改湖廣提標兵爲雲南提標率之進克辰龍關克辰州沅州復進克鎮遠平越下貴陽趨雞公背三桂兵焚鐵索橋走桑額督土司沙起龍等築浮橋濟師旋從大將軍貝子彰泰攻下雲南省城其將馬寶胡國柱自四川還救桑額與副都統託岱等破寶於楚雄寶走降又與都統希福困國柱於永昌國柱自經死雲南平初桑額標兵中道有潰散者上遣左都御史哲勒肯按治疏言標兵家口在武昌無資養贍逃回者千餘人上切責桑額不恤士卒部議奪職命留任叙功復職二十五年卒

卓布泰瓜爾佳氏滿洲鑲黃旗人父衛齊費英東第九弟事太祖從特爾晉等率兵伐虎爾哈得五百戶以歸授世職備禦天聰初從太宗伐明略遵化進世職游擊上統大軍出征每令衛齊留守盛京任八門提督卒順治間追諡端勤子熬拜有自傳卓布泰其次子也事太宗授牛叅額真崇德四年從承政薩木什喀索海伐瑚爾哈部鏗陳阿薩津二城以兵四百逆戰卓布泰與牛叅額真薩弼圖率甲士九十人擊敗之斬級五十敵復與索倫部長博穆博果爾合兵以拒卓布泰率先邀擊俘六十餘人五年擢甲喇額真六年從伐明圍錦州明總督洪承疇屯山口拒守卓布泰與梅勒額真翁阿岱迎戰明兵敗走大軍合擊復與翁阿岱力戰破敵師還敵馘我後翁阿岱中創仆卓布泰還殲敵掖翁阿岱乘馬歸七年從伐明徇山東至青州屢敗明兵明將張登科和應薦等合八鎮兵來拒卓布泰率兵奮擊大破之復乘夜襲破餘兵八年師還賚白金兼任兵部理事官順治元年偕甲喇額真沙爾瑚達略黑龍江克圖瑚勒禪城俘二百餘人是冬從大將軍豫親王多鐸西討李自成次潼關與固山額真恩格

圖等迭戰破敵二年進克西安自成走湖廣與巴牙喇繼章京敦拜阿爾津等追擊殲敵騎三百移師下江南從貝勒博洛徇浙江敗敵於杭州於海甯於平湖得戰艦百餘三年復從徇福建署梅勒額真次延平明唐王聿鍵走汀州師從之卓布泰別將兵攻克福州敍功并考滿進世職三等阿達哈哈番五年從鄭親王濟爾哈朗下湖廣六年復署梅勒額真與因山額真佟圖賴等自湘潭進克衡州明將胡一清以步騎萬餘踞城南山岡列七營與佟圖賴合攻之潰走復進克道州靖州師還優賚授刑部侍郎累擢內大臣鑲黃旗滿洲固山額真進世職二等阿思哈尼哈番十四年授征南將軍率師至廣西會湖南四川兩軍規取雲貴十五年九月師次獨山與信郡王多尼及吳三桂會約師期語詳洪承疇傳卓布泰率兵自都勻進次盤江明兵聞師至沈舟潛匿山谷中卓布泰用土司岑繼魯言度下流取所沈舟中夜濟師明將李承爵以萬餘人屯涼水井師進擊破之攻雙河口山寨明將李定國以象陳拒戰擊潰之定國悉衆爲三十營列柵固守卓布泰分軍爲三隊張左右翼以進再戰皆勝追奔四

十餘里獲其象馬聞明兵尙堅守鐵索橋乃自普安問道進羅平會信郡王等軍攻克雲南省城明桂王奔永昌十六年二月從貝勒尙善等進軍嶺南破白文選於玉龍關渡瀾滄江取永昌明桂王奔騰越師復進渡潞江定國以六千人伏磨盤山卓布泰分兵爲八隊以火器發其伏掩擊斬殺過半遂克騰越明桂王奔緬甸卓布泰乘勝追擊越南甸至猛卯而還捷聞資蟒服鞍馬康熙元年二月師還上命內大臣迎勞尋追論在軍勅將士功罪不實與議政王貝勒爭辨語怨望論絞籍沒上命寬之奪世職罷都統三年復世職八年復以弟鰲拜得罪奪世職十六年再復世職十七年卒諡武襲巴哈卓布泰弟事太宗以一等侍衛授議政大臣順治初入關從肅親王豪格征張獻忠有功世職累進一等甲喇章京睿親王討姜瓖巴哈請從征王勿許拂衣起坐論死命罰緩以贖睿親王攝政巴哈兄弟獨不附肅親王卒於獄子富綬尙幼尙書宗室鞏阿岱議殺之巴哈及內大臣哈什屯持不可乃止鞏阿岱因與弟錫翰及內大臣西訥布庫等欲構陷以罪聞上嘉其勤勞議乃寢世祖親政使證鞏阿岱等罪

狀皆坐誅復命爲議政大臣世職累進一等阿思哈尼哈番加少傅兼太子太傅授領侍衛內大臣繫拜得罪坐罷官奪世職卒蘇勒達巴哈子事聖祖授侍衛累遷鎮黃旗蒙古都統領侍衛內大臣上親征噶爾丹從行贊議進擊復扈上巡行塞北賜內廐馬卒諡恪僖

卓羅滿洲正白旗人巴篤理子也卓羅襲三等副將兼任牛叅額眞崇德三年從伐明薄明都明太監楊永盛出戰卓羅以三百人擊敗之遂進略山東四年圍錦州入其郭獲守備一六年復圍錦州擊敗明總督洪承疇八年授刑部參政順治初從入關破李自成進世職一等梅勒章京擢正白旗梅勒額眞三年從大將軍順承郡王勒克德渾下湖廣敗自成黨一隻虎於荊州師還賞黃金十兩白金三百兩是時明桂王由榔駐武岡其將王進才等分守長沙衡州寶慶大將軍恭順王孔有德等收湖南諸郡縣命卓羅及梅勒額眞藍拜率師益有德四年自岳州趨長沙進才棄城走卓羅等追擊敗之遂與智順王尙可喜共擊敗明總兵徐松節率舟師還長沙遣甲喇額眞張國柱札蘇藍等以偏師

擊敗明總兵楊國棟於天心湖卓羅會有德下祁陽道熊熊嶺克其城進攻武岡擊敗明將劉承胤於夕陽橋承胤降明桂王走桂林遂取武岡五年師還上賚如自荊州還時累擢吏部尙書兼鎮白旗滿洲固山額真進一等精奇尼哈番兼拖沙喇哈番九年十一月授靖南將軍下廣東旋以廣東垂定罷十二年八月命與固山額真阿爾津帥師屯荊州時張獻忠將孫可望李定國白文選等降於明屯辰州十三年八月卓羅與阿爾津道澧州常德下辰州可望焚舟夜遁卓羅與梅勒額真秦什哈巴牙喇章京費雅思哈等率兵渡江攻之遂克辰州十四年可望詣長沙降定國文選等從明桂王入雲南十五年規取雲南吳三桂自四川征南將軍卓布泰自廣西卓羅從信郡王多尼自湖南三道并進十六年正月合攻雲南克之屢敗文選定國兵收永昌騰越追擊至南甸命卓羅守雲南贊蟒服鞍馬明桂王奔緬甸定國屯孟艮以印劄招元江土司那嵩十月卓羅與噶什布賢噶喇昂邦白爾赫圖等共擊之克其城那嵩自焚死十八年定西將軍愛星阿與三桂帥師入緬甸卓羅仍守雲南緬甸執明桂

王詣軍雲南平康熙元年召卓羅振旅還京進二等伯七年卒諡忠襄乾隆間定封號曰昭毅永慶卓羅四世孫乾隆間以護軍參領降襲三等伯旋擢副都統從征準噶爾有功加雲騎尉仍進二等伯出爲烏魯木齊副都統遷江甯將軍移綏遠城將軍召還擢禮部尙書罷授內大臣嘉慶十年七月卒諡敬僖旋以在綏遠城嘗受賊事露奪諡

愛星阿滿洲正黃旗人揚古利孫也父塔瞻襲封一等公卒愛星阿襲封世祖念揚古利舊勞命加給三等阿達哈哈番俸八年授領侍衛內大臣明桂王由榔與其將沐天波等奔緬甸李定國居孟艮白文選屯木邦皆在雲南邊外上命吳三桂鎮雲南三桂疏請發兵入緬甸取由榔十七年授愛星阿定西將軍與都統卓羅果爾欽遜塔護軍統領畢力克圖費雅思哈前鋒統領白爾赫圖率禁旅會三桂南征十八年師行聞世祖大行三桂猶豫不進愛星阿曰君命不可棄督兵先行三日三桂乃發九月師次大理休兵秣馬逾月出騰越道南甸隴川猛卯十一月至木邦獲文選將馮國恩訊知文選屯錫箔江濱定國與

不協走景線愛星阿令白爾赫圖等簡精銳疾馳三百餘里至江濱文選已毀橋走茶山大軍至結筏以濟遣總兵馬寧沈應時追之愛星阿與三桂督師趨緬甸時緬甸酋盡殺桂王從官天波以下數十人密使人守之謀禽以歸我師十二月師次舊晚坡去其庭六十里緬甸使詣軍前請遣兵薄城當以桂王獻愛星阿遣白爾赫圖將前鋒百人進次蘭鳩江濱復令畢力克圖等將護軍二百人繼其後緬甸以舟載桂王及其孥並故從官妻女獻軍前寧應時追文選及於猛養文選度不能脫遂降定國走死猛獵捷聞聖祖諭嘉獎命以愛星阿所俘獲昇三桂區處振旅還京師加太保兼太子太保敕書增紀軍功三年二月卒諡敬康子富善襲授領侍衛內大臣聖祖親征噶爾丹富善將鑲紅旗兵扈上出中路進次克魯倫河閱選駝馬徵輸芻粟皆當上意師還加太子太保卒乾隆初追諡恭懿

遜塔滿洲鑲藍旗人安費揚古孫也父碩爾輝安費揚古既卒太祖以所屬人戶分編牛錄授碩爾輝牛錄額真卒遜塔嗣太宗嘉其能子世職牛錄章京崇

德三年授戶部副理事官是冬伐明貝勒岳託將右翼自牆子嶺入邊遜塔署
甲喇額真從噶布什賢噶喇依昂邦席特庫等擊破明總督吳阿衡軍遂越明
都略山東明年春師出邊明兵蹙我後遜塔從巴牙喇蠶章京圖賴等奮戰卻
之明兵侵喀喇沁管遜塔移兵赴援明兵潰走六年圍錦州明總督洪承疇赴
援屯松山遜塔與甲喇額真藍拜率兵擊之破三壘明兵乘陰兩犯我師右翼
復與藍拜步戰卻敵八年授甲喇額真順治元年從入關破李自成進世職三
等甲喇章京三年從大將軍肅親王豪格西討張獻忠道漢中與固山額真巴
哈納等擊破叛將賀珍進次西充獻忠率其徒拒戰遜塔與固山額真李國翰
等迭擊破之五年師還兼任刑部理事官命率師駐防淮安六年莒州土寇曹
良臣破海州知州張懋勤州同李士麟死之遜塔督兵赴援良臣走保馬鬣山
進擊破之時設浙淮鹽務理事兼戶部侍郎銜上以命遜塔駐揚州七年改督
理漕運戶部侍郎仍駐淮安八年官裁遜塔還京授鎮藍旗滿洲梅勒額真遇
恩詔進世職三等阿思哈尼哈番十三年授工部尙書十五年監修壇殿工成

進世職二等尋兼授鎮蓋旗蒙古固山額真十七年罷尙書專任都統旋命從定西大將軍愛星阿率師下雲南明年十一月會師木邦趨緬甸得明桂王以歸叙功進世職一等拖沙喇哈番四年調本旗滿洲都統十二月卒諡忠襄子馬錫泰襲世職授佐領兼前鋒參領康熙間從信郡王鄂札征察哈爾布爾尼師次達祿布爾尼屯山岡列火器拒戰馬錫泰率前鋒薄險四戰皆捷進世職三等精奇尼哈番又從討吳三桂遷本旗滿洲副都統自湖廣出廣西下雲南石門坎黃草壩諸戰皆在行間進破雲南省城逐賊楚雄降三桂將馬寶毛養元等師還進世職一等卒孫德彝降襲一等阿思哈尼哈番乾隆初定封一等男都爾德亦安費揚古孫父阿爾岱以牛衆額真事太宗駐耀州禦明兵有功從攻大凌河戰死贈世職備禦都爾德襲順治初授刑部理事官從入關擊李自成署巴牙喇叢章京從豫親王多鐸西征戰陝州督兵陟山拔其壘復破敵潼關尋自河南下江南逐明福王由松至蕪湖截江而戰大敗之復從端重親王博洛定浙江徇福建偕巴牙喇叢章京阿濟格尼堪攻汀州破明唐王聿鍵

復從鄭親王濟爾哈朗略湖廣討李自成餘黨李錦等師還真除巴牙喇肅章
京授議政大臣世職累進一等阿思哈尼哈番康熙三年卒賜祭葬諡忠襄
論曰順治初取福唐二王不再莽而定桂王勢更蹙以有闖獻餘衆死寇力戰
支拄十餘年陳泰定湖北兵力至常岳阿爾津繼之奄有湖南李國翰略四川
貴州卓布泰下雲南卓羅從信郡王爲之佐愛星阿繼之遜塔爲之佐與吳三
桂合軍宋入緬甸取桂王明宗至是始盡燬矣

清史稿

列傳二十四

洪承疇

以成

孟喬芳

張文

張存仁

洪承疇字亨九福建南安人明萬歷四十四年進士累遷陝西布政使參政崇禎初流賊大起明莊烈帝以承疇能軍遷延綏巡撫陝西三邊總督屢擊斬賊渠加太子太保兵部尙書兼督河南山陝川湖軍務時諸賊渠高迎祥最強號闖王李自成屬焉承疇與戰敗績莊烈帝擢盧象昇總理河北河南山陝川湖軍務令承疇專督關中復與自成戰臨潼大破之迎祥就俘自成號闖王分道入四川承疇與屢戰輒勝自成還走潼關承疇使總兵曹變蛟設伏邀擊自成大敗以十八騎走商洛關中賊略盡是歲爲崇德三年太宗伐明師薄明都莊烈帝徵承疇入衛明年春移承疇總督薊遼軍務帥秦兵以東授變蛟東協總兵王廷臣遼東總兵白廣恩援勦總兵與山海馬科寧遠吳三桂二鎮合軍復命宣府楊國柱大同王樸密雲唐通各以其兵至凡八總兵兵十三萬馬四萬

咸隸承疇太宗師下大凌河祖大壽入錦州爲明守松山杏山塔山三城相與爲犄角承疇至軍莊烈帝遣職方郎中張若麒趣戰乃進次松山國柱戰死以山西總兵李輔明代六年八月太宗自將禦之上度松山杏山間自烏忻河南山至海當大道立營承疇及遼東巡撫邱民仰率諸將駐松山城北乳峯山步兵分屯乳峯山至松山道中爲七營馬兵分屯松山東西北三方戰敗移步兵近松山城爲營復戰又敗上誡諸將曰今夕明師其遁命諸軍當分地爲汛以守敵遁視其衆寡遣兵追擊至塔山而止分遣諸將截塔山杏山道及桑噶爾寨堡又自小凌河西直抵海濱絕歸路是夜三桂樸通科廣恩輔明皆率所部循海引退爲我師掩殺死者不可勝計承疇民仰率將吏入松山城守上移軍松山議合圍變蛟夜棄乳峯山寨悉引所部馬步兵犯鎮黃旗汛地者一犯正黃旗汛地者四直攻上營殊死戰變蛟中創奔還松山三桂樸引餘兵入杏山上遣諸將爲伏於高橋及桑噶爾寨堡明兵自杏山出奔寧遠遇伏殪強半三桂樸僅以身免承疇師十三萬死五萬有奇諸將潰遁惟變蛟廷臣以殘兵萬

除從城圍既合上以敕諭承疇降九月上還盛京命貝勒多鐸等留護諸軍承疇悉衆突圍攻鎮黃旗擺牙喇阿禮哈超哈戰敗不能出十月命肅郡王豪格公滿達海駐松山十二月承疇聞關內援師且至復遣將以兵六千夜出攻正紅旗擺牙喇阿禮哈超哈及正黃旗蒙古營戰敗城閉不得入強半降我師餘衆潰走杏山道遇伏死莊烈帝初以楊繩武督師援承疇繩武卒以范志完代皆畏我師強宿留不進承疇被圍閱六月食且盡明年二月松山城守副將夏成德使其弟景海通款以子舒爲質我師夜就所守堞樹雲梯阿山部卒班布里何洛會部卒羅洛科先登遂克其城獲承疇民仰變蛟廷臣及諸將吏降殘卒三千有奇時爲崇德七年二月壬戌上命殺民仰變蛟廷臣而送承疇盛京上欲收承疇爲用命范文程諭降承疇方科跣謁罵文程徐與語泛及今古事梁間塵偶落著承疇衣承疇拂去之文程遽歸告上曰承疇必不死惜其衣況其身乎上自臨視解所御貂裘衣之曰先生得無寒乎承疇隍視久歎曰眞命世之主也乃叩頭請降上大悅即日賞賚無算置酒陳百戲諸將或不悅曰上

何待承疇之重也上進諸將曰吾曹櫛風沐雨數十年將欲何爲諸將曰欲得中原耳上笑曰譬諸行道吾等皆瞽今獲一導者吾安得不樂居月餘都察院參政張存仁上言承疇歡然倖生宜令薙髮備任使五月上御崇政殿召承疇及諸降將祖大壽等入見承疇跪大清門外奏言臣爲明將兵十三萬援錦州上至而兵敗臣入守松山城破被獲自分當死上不殺而恩育焉今令朝見臣知罪不敢遽入上使諭曰承疇言誠是爾時與我交戰各爲其主朕豈介意且朕所以戰勝明兵遂克松山錦州諸城皆天也天道好生故朕亦恩爾爾知朕恩當盡力以事朕朕昔獲張春亦嘗遇以恩彼不能死明又不能事朕卒無所成而死爾毋彼若也承疇等乃入朝見命上殿坐賜茶上語承疇曰朕觀爾明主宗室被俘置若罔聞將帥力戰見獲或力屈而降必誅其妻子否亦沒爲奴此舊制乎抑新制乎承疇對曰舊無此制邇日諸朝臣各陳所見以聞於上始若此爾上因歎謂君闇臣蔽遂多枉殺將帥以力戰沒敵斥府庫財贖而還之可也奈何罪其孥其虐無辜亦甚矣承疇垂涕叩首曰上此諭真至仁之言也

上還宮命宴承疇等於殿上宴畢使大學士希福等諭曰朕方有元妃之喪未躬賜宴爾等勿以爲意承疇等復叩首謝莊烈帝初聞承疇死予祭十六壇建祠都城外與邱民仰並列莊烈帝將親臨奠俄聞承疇降乃止承疇既降隸鎮黃旗漢軍太宗遇之厚然終太宗世未嘗命以官順治元年四月睿親王多爾袞帥師伐明承疇從既定京師命承疇仍以太子太保兵部尙書兼右副都御史同內院官佐理機務旋與同官馮銓啟睿親王復明內閣故事題奏皆下內閣擬旨分下六科鈔發各部院九月上至京師與銓及謝陞奏定郊廟樂章二年豫親王多鐸師下江南閏六月命承疇以原官總督軍務招撫江南各省鑄招撫南方總督軍務大學士印賜敕便宜行事是時明唐王聿鍵稱號福建其大學士黃道周率師道廣信衢州向徽州左僉都御史金聲家休甯募鄉兵十餘萬屯績溪諸宗姓高安王常洪保徽州薪水王術韜子常采自號樊山王屯潛山太湖間由樁號金華王據饒州誼石號樂安王誼泐號瑞安王分屯溧陽金壇興化諸縣荆本徹以舟師駐太湖收復入崇明皆爲明守承疇至官招撫

江南甯國徽州江西南昌南康九江瑞州撫州饒州臨江吉安廣信建昌袁州諸府十月遣提督張天祿總兵卜從善李仲興劉澤泳等攻破績溪十二月進破道周於婺源聲道周見獲皆不屈送江南殺之總兵李成棟破崇明本撤走入海殺其將李守庫徐君美三年二月遣總兵馬得功卜從善等擊破司空寨斬守寨石應璉應璧等五人獲常采既誼石誼泐合兵二萬犯江南承疇先事誅內應西溝池萬德華郭世彥尤居等八十餘人誼石等攻神策門分兵出朝陽太平二門截誼石等後乃啓神策門出城兵奮擊破之追及攝山斬馘無算承疇疏請還京以江南未大定不允賜其妻白金百貂皮二百八月征南大將軍貝勒博洛克金華獲誼石九月誼泐復犯江寧承疇出禦追獲誼泐及所置經略韋爾韜總兵楊三貫夏含章十二月天祿搜婺源嚴坑山獲常淇及所置監軍道江於東職方司許文玠等四年二月從善及總兵黃鼎攻宿松獲誼泐弟瑞昌王誼貴及所置軍師趙正下饒州獲由樞及其族人常泮常泚常涓並請命斬之江南衆郡縣以次定明魯王以海轉徙浙閩海中號監國明諸遺臣

猶密與相聞四年四月明給事中陳子龍家華亭陰受魯王官謀集太湖潰兵舉事承疇遣章京索卜圖往捕子龍投水死是月柘林游擊陳可獲謀者謝堯文得魯王敕封承疇國公江甯巡撫土國寶爲侯又得魯王將黃斌卿與承疇國寶書鎮守江甯昂邦章京巴山張大猷以聞上獎巴山等嚴察亂萌命與承疇會鞫謀者別敕慰諭承疇粵僧函可者爲故明尙書韓日續子日續於承疇爲師生函可將還里乞承疇畀以印牌護行出城守者譏察筒中得文字觸忌諱巴山張大猷以聞承疇疏引各部議當奪職上命貫之承疇聞父喪請解任守制上許承疇請急歸命治喪畢入內院治事五年四月還京師六年加少傅兼太子太傅疏請定會推督撫提鎮行保舉連坐法得旨自後用督撫提鎮內院九卿咸舉所知得人者賞誤舉者連坐八年閏二月命管都察院左都御史尋甄別諸御史爲六等魏瑄等二十二入差用陳昌言等二人內陞張煊等十一人外轉王世功等十七人外調降黜有差煊疏劾吏部尙書陳名夏因及承疇嘗與名夏及尙書陳之遴集火神廟屏左右密議逃叛承疇又嘗私送其母

歸里疏入上方狩塞外巽親王滿達海居守集諸王大臣會鞠承疇言火神廟集議即議甄別諸御史定等差非有他也並以送母未請旨引罪名夏亦列辨因坐煊誣奏論死未幾上雪煊冤黜名夏因諭承疇火神廟集議事雖可疑難以懸擬送母歸原籍未奏聞爲親甘罪情尙可原留任責後效九年五月承疇聞母喪命入直如故私居持服賜其母祭葬九月達賴喇嘛來朝上將幸代噶待喇嘛至入覲承疇及大學士陳之遴疏諫上爲罷行並遣內大臣索尼傳諭曰卿等以賢能贊密勿有所見聞當以時入告朕生長深宮無自洞悉民隱凡有所奏可行即行縱不可行朕亦不爾責也十年正月調內翰林弘文院大學士明桂王由榔稱號肇慶類年轉戰兵燬地蹙至是居安隆所雲南貴州二省尙爲明守諸將李定國孫可望等四出侵略南攻湖南南境諸州縣東陷桂林西據成都兵連不得息五月上授承疇太保兼太子太師內翰林國史院大學士兵部尙書兼都察院右副都御史經略湖廣廣東廣西雲南貴州等處地方總督軍務兼理糧餉敕諭撫鎮以下咸聽節制攻守便宜行事滿兵當留當撤

卽行具奏命內院以特假便宜條款詳列敕書宣示中外並允承疇疏薦起原
任大學士李率泰督兩廣以江西寇未盡命承疇兼領鑄經略大學士印授之
臨發賜蟒朝衣冠帶鞞襪松石嵌撒袋弓矢馬五鞍轡二諸將李本深等八十
七人朝衣冠帶撒袋弓矢刀馬鞍轡有差承疇至軍疏言湖南駐重兵足備防
勦而各郡竄遠兵力所不及郝搖旗一隻虎等竊伏湖北荆襄諸郡倘南窺澧
岳則我軍腹背受敵臣與督臣議臣宜往來長沙四應調度督臣率提標兵駐
荊州別遣兵增武昌城守以壯聲援又疏言桂林雖復李定國軍距桂林僅二
百里滿洲援勦官兵豈能定留克復州縣何以分守又使孫可望調我兵出援
潛自靖沅截粵西險道則我首尾難顧置孤軍於徼外其危易見臣已分兵馳
赴俾佐戰守且當親歷衝永察機宜以聞十二月上授固山額眞陳泰爲定南
靖寇大將軍及固山額眞藍拜濟席哈擺牙喇勳章京蘇克薩哈等率師鎮湖
南十一年二月命靖南王耿繼茂率所部自廣州移鎮桂林皆承疇疏發之也
是歲孫可望劫桂王殺大學士吳貞毓等方內訌十二年六月可望遣劉文秀

攻常德分兵使盧明臣馮雙禮攻武昌岳州承疇陳泰遣蘇克薩哈迎擊破之明臣墮水死文秀雙禮皆走貴州陳泰旋卒於軍以固山額眞阿爾津爲寧南靖寇大將軍率固山額眞卓羅祖澤潤等分駐荊州長沙十三年考滿加太傅仍兼太子太師李定國奉明桂王入雲南湖廣無兵事阿爾津議以重兵駐辰州謀自沅靖入滇黔承疇與異議上召阿爾津還京師以宗室羅託代十四年可望叛其主舉兵攻雲南與定國戰而敗十一月詣長沙降時上已允承疇解任還京師養疴至是命承疇留任督所部與羅託等規取貴州並命平西大將軍吳三桂自四川征南將軍卓布泰自廣西分道入十五年正月復命信郡王多尼爲安遠靖寇大將軍帥師南征於是承疇與羅託會師常德沅州靖州入貴州境克鎮遠卓布泰招南丹那地撫甯諸土司下獨山州會克貴陽三桂亦自重慶取遵義進攻開州桐梓以其師來會承疇上疏籌軍食言貴州諸府州縣衛所僅留空城即有餘糧兵過輒罄惟省倉存米七千餘石穀四千餘石足支一月糧臣所部兵令分駐鎮遠偏橋興隆清平平越諸處降兵暫駐三五

日改屯天柱會同黔陽諸縣及湖南沅州四川兵駐遵義廣西兵駐獨山使分地就糧聞信郡王大兵自六月初發荊州需糧多且倍徙貴州山深地寒收穫皆在九月臣方遣吏勸諭軍民須納今歲秋糧之半並檄下沅州運糧儲饋遠又令常德道府具布囊糶套木架繩索思南石阡諸府州縣衙所及諸土司募夫役具工糶以赴軍興九月授武英殿大學士信郡王多尼師至駐平越楊老堡承疇三桂卓布泰皆會議多尼軍出中路經關嶺鐵索橋至雲南省城行一千餘里三桂軍自遵義經七星關凡一千五百餘里先中路十日行卓布泰以南甯方有寇自貴州廣西邊境平浪永順瑞威透山出安隆所黃草壩羅平州凡一千八百餘里先四川兵十五日行既定議承疇還貴陽與羅託駐守遣提督張勇等從多尼軍明將李定國等拒戰皆敗明桂王奔永昌十六年正月乙未三路師會克雲南省城明桂王奔緬甸承疇如雲南疏言雲南險遠請如元明故事以王公坐鎮上以命三桂三月承疇至雲南疏言信郡王令貝子尙善及三桂等追勦至永昌騰越明將賀九義李成爵李如碧廖魚鄒自貴馬得鳴

輦收集潰兵分遁沅江順甯雲龍爛滄麗江處處窺伺民間遭兵火重以饑饉
近永昌諸處被禍更烈周數百里杳無人烟省城米價石至十三兩有奇諸軍
就糧宜良富民羅次姚安賓川臨安新興澂江陸涼諸處上明察萬里自有宸
斷俾邊臣得以遵奉疏入上命戶部發帑三十萬以十五萬賑兩省貧民十五
萬命承疇收貯備軍饟不給八月承疇疏言兵部密咨令速攻緬甸臣受任經
略目擊民生彫敝及土司降卒尙懷觀望以爲須先安內乃可勦外李定國等
竄伏孟浪諸處山川險阻兼瘴毒爲害必待霜降始消明年二月青草將生瘴
卽復起其間可以用師不過四月虛未能窮迫定國等覲自景東沅江復入廣
西要結諸土司私授劄印歃血爲盟若聞我師西進必且避實就虛合力內犯
我軍相隔已遠不能回顧省城留兵亦未遑堵禦致定國等縱逸所關非細臣
審度時勢權其輕重謂今歲秋冬宜暫停進兵俾雲南迤西殘黎稍藉秋收以
延餘喘明年盡力春耕漸圖生聚我軍亦得養銳蓄威居中制外俾定國等不
能窺動靜以潛逃諸土司不能伺間隙以思逞絕殘兵之勾結斷降卒之反側

則飢飽勞逸皆在於我定國等潛藏邊界無居無食瘴癘相侵內變易生機有可竣是時芻糧輾備苗蠻輯服調發將卒次第齊集然後進兵庶爲一勞永逸安內剿外長計疏下議政王貝勒大臣會議如所請暫停進兵十月以目疾乞解任命回京調理明年三桂進兵攻緬甸獲明桂王以歸語見三桂傳聖祖卽位承疇乞致仕予三等阿達哈哈番世職康熙四年二月卒諡文襄子士欽順治十二年進士官至太常寺少卿夏成德廣甯人旣以松山降隸正白旗漢軍順治初授三等昂邦章京其弟景海授一等甲喇章京出爲山東沂水總兵嘗疏請收沂州明大學士張四知等財產又越職乞頒方印皆不得請旋以縱所部越境暴掠與青州道韓方昭互揭還京師卒乾隆初定封三等子

孟喬芳字心亭直隸永平人父國用明甯夏總兵官喬芳仕明爲副將坐事罷家居天聰四年太宗克永平喬芳及知縣張養初家居兵備道白養粹罷職副將楊文魁遊擊楊聲遠等十五人出降命以養粹爲巡撫養初爲知府喬芳文魁仍爲副將率降兵從諸貝勒城守上移軍向山海關諸貝勒率喬芳文魁聲

遠入謁行營上召三人者酌以金卮且諭之曰朕不似爾明主凡我臣僚皆令侍坐吐衷曲同飲食也喬芳使調陽和而明總兵祖大壽亦使詣喬芳調我師喬芳縛以獻五月明兵取灤州貝勒阿敏乘永平出塞瀕發屠城民諸降官養粹養初等死者十一人喬芳文魁聲遠及郎中陳此心得免喬芳從師還隸烏真超哈爲牛錄額真五年七月置六部以喬芳爲刑部漢承政授世職二等參將崇德三年更定官制改左參政四年烏真超哈析置八旗四固山以喬芳兼領正紅鑲紅兩旗梅勒額真七年從伐明克塔山城烏真超哈八旗復析置八固山改鑲紅旗梅勒額真遂爲漢軍鑲紅旗人八年或訴貝勒羅洛渾家人奪金喬芳置不問坐贖徇降世職三等甲喇章京旋以從克前屯衛中後所二城加半箇前程順治元年入關改左侍郎從諸軍西討二年四月以兵部右侍郎兼右副都御史總督陝西三邊時張獻忠尙據四川關中羣盜並起叛將賀珍躡漢中興安諸府是年冬武大定叛固原徒黨甚衆初上命內大臣何洛會帥師鎮西安至是就拜定西大將軍遣固山額真巴顏李國翰將禁旅濟師三年

復敕定遠大將軍肅親王豪格帥師督諸將自漢中興安入四川取獻忠喬芳於其間亦分遣所部四出捕治初上官長安民胡守龍者挾左道惑民妄改元清光將爲亂喬芳遣副將陳德捕誅守龍散其脅從三年春賀珍與其徒孫守法胡向化等以七萬人攻西安何洛會主城守喬芳遣德軍西門副將任珍軍北門往來衝突會李國翰帥至賀珍敗走是年十月肅親王豪格師旣入川喬芳亦遣總兵官范蘇等攻獻忠部衆爲伏孖溪第濤子戰白水青川屢破之復以反間殺其渠況益勤等遂收龍安三年五月喬芳帥師出駐固原討大定之黨分遣諸將任珍擊斬白天爵等劉芳名攻甯夏俘王元焦洛陳德攻鎮原降姬蛟王總管於是固原西北悉定復遣珍德及副將馬甯王平徇興安討賀珍之黨戰葭麥山再戰板橋斬胡向宸困椒溝破藥箭寨斬孫守法破漫營山寨禽米國珍李世英於是興安定四年秋馬德亂甯夏復遣馬甯會甯夏兵共討之戰亂麻川逐至河兒坪斬德又遣張勇劉友元攻鐵角城復戰安家川禽賀宏器攻李明義寨禽明義於是瓊慶亦定乃益遣陳德王平等招降青贊寨渠

折自明三十六寨渠王希榮輓轡築渠高一祥擊斬天峯寨渠張貴人於是關中羣盜垂盡五年四月流賊一朵雲馬上飛等攻西鄉喬芳遣任珍等討之斬所署監軍許不惑凡千餘級生致其渠河西回米喇印丁國棟挾明延長王識錄爲亂既陷甘涼渡河東殘岷蘭洮河諸州薄鞏昌喬芳帥師出駐秦州遣趙光瑞馬甯等赴援城兵出夾擊斬百餘級甯等復戰廣武坡逐北七十餘里斬三千餘級鞏昌圍解喇印國棟之黨數百人分擾臨洮岷州內官營喬芳部勅諸將令張勇陳萬略向臨洮馬甯劉友元取內官營趙光瑞佟透徇岷洮河三州勇等敗賊馬韓山斬級七百進復臨洮光瑞等敗賊梅川得其渠丁光射斬級三千岷洮河三州皆下甯等直擊內官營斬級八百喇印國棟之徒退據蘭州閏四月喬芳與侍郎額塞率師自鞏昌薄蘭州勇敗賊馬家坪獲贖錢與甯光瑞會師蘭州城下攻拔之別遣光瑞克舊洮州其渠丁嘉升走死師渡河七月定涼州八月攻甘州喬芳遣張勇夜攻城而與昂邦章京傅喀禪及甯光瑞等爲繼喇印等食盡皆出降六年徵諸道兵下四川喇印降後授副將在蘭州

軍中規鎮兵憚遠征因碁中軍參將蔣國泰戕甘肅巡撫張文衡等據甘州以叛國棟亦攻陷涼肅二州喬芳帥師自蘭州渡河而西與傅喀禪等會師合圍攻不下深溝堅壘以困之喇印等食盡夜遁喬芳遣兵追及之水泉擊殺喇印國棟復與纏頭回土倫泰等據肅州號倫秦王而國棟自署總兵官城守出掠武威張掖酒泉會平陽盜渠虞允韓昭宣等應大同叛將姜瓖爲亂以三十萬人陷蒲州上命喬芳與額塞還軍禦之喬芳留勇甯等圍肅州率師遂東八月師自潼關濟督協領根特副將趙光瑞等克蒲州斬級七千進次甯晉瓖將白璋等六千人往攻榮河光瑞等擊破之斬級二千有奇璋北走師從之迫河賊多人水死遂擊斬璋餘賊入孫吉鎮殲焉復進向猗氏行十餘里瓖所置監軍道衛登芳以數千人依山拒我師其將張萬全又以四千人助戰光瑞等擊斬萬全乃還攻獲登芳斬其將王國賢等三十餘人級三千有奇又冷章京杜敏等攻解州破其渠邊王張五黨自成等榮河猗氏解州皆下杜敏等殲餘寇根特等又破所置都督郭中傑於侯馬驛九月光瑞等進克運城斬允昭宣瓖之

徒內犯者皆盡誅十一月勇甯克肅州誅國棟倫泰及其黨黑承印等斬五千餘級河西平七年二月諭功加兵部尙書進世職一等阿達哈哈番十二月喬芳遣任珍擊斬興安寇何可亭七年遣趙光瑞等討北山寇劉宏才戰保安禽其軍師苗惠民戰合水禽斬宏才八年遣游擊陳明順等擊敗維南寇何柴山游擊仰九明調紫陽山寇孫守金復令光瑞等會興安鎮兵擊斬守金及其徒魁興甯趙定國謝天奇等犁其寨喬芳督陝西十年破滅羣盜降其脅從前後十七萬六千有奇獎拔諸將不限資格如張勇馬甯趙光瑞陳德狄應魁劉友元輩皆自偏裨至專閫諸寇旣殄疏言陝西寇劇多荒田請蠲其賦分兵徠民行屯田法乃遣諸將白士麟等分屯延慶平固諸地歲得粟四萬二千石有奇以佐軍精恩詔累進三等阿思哈尼哈番加太子太保十年二月命兼督四川兵馬錢糧疏言陝西七鎮及督撫各標爲兵九萬八千有奇合滿洲四旗及平西王吳三桂固山額眞李國翰兩軍歲餼三百六十萬而弱而陝西賦入一百八十六萬不足者殆半後將難繼甘肅處邊遠興安界三省兵當循舊額延綏

甯夏固原臨鞏四鎮鎮留三千人慶陽協五百人餘五千五百人可省也漢羌
既駐三桂國翰兩軍宜裁總兵官與鎮置副留千人陽平關黑水峪漢陰縣各
五百人餘二千五百人可省也提督駐省會留二千人餘二千人亦可省也各
道標兵悉令屯田延鎮定邊神木三道無屯田止用守兵計所省又二千餘人
都省兵一萬二千人省餼歲三十一萬今四川未定當令右路總兵官馬甯率
精兵三千駐保甯以步兵五千分駐保甯迤北廣元昭化間以屯田爲持久三
桂駐漢中相爲犄角規取四川既復疏言師進取四川宜隨在留兵駐防以樹
干城謀生聚師行當人給馬三件丁一携甲仗以利攸往上褒其謀當十月西
甯回謀爲亂遣狄應魁捕治得其渠祁敖牙固子等以歸喬芳屢乞退至是以
疾告加少保召還京師十二月命未至而喬芳卒諡忠毅太宗拔用諸降將從
入關出領方面喬芳績最顯張存仁亞焉聖祖警誡漢軍諸官吏因曰祖宗定
鼎初委任漢軍諸官吏與滿洲一體其間頗有宣猷效力如喬芳存仁輩朝廷
亦得其用云張文衡遼東開平衛人明諸生天聰八年閏八月太宗自將伐明

入宣府文衡自大同詣軍前求見言在明爲代王參謀明諸臣方尙貪酷虐民罔上必有聖主應天而興故徒步上謁旋疏言大同城小而堅師攻當先關而後城攻關宜穴地宣府城大破碎宜決洋河灌之九年正月復疏策進取言明文武將吏皆以賂得無謀無勇又以貪故餽減器窳兵不用命所以能拒我者不過畏殺畏掠畏父母妻子離散乃倚火器以死禦我今宜大新被兵山陝川湖陷於流賊賊半天下兵亦半天下惟東南無事又困於新饑上不及此時進兵明不恒弱我不恒強節短勢險人有鼎立之志豈非自失其機反貽異日憂乎願上母負天生上之心也疏入上曰待朕思之二月遣貝勒多爾袞帥師收察哈爾文衡又言宜率蒙古入偏崙略太原假中國物力以富蒙古且張軍威並可近招流賊併力並進上授文衡祕書院副理事官賜田宅銀幣以大臣雅希禪女妻焉隸麻黃旗漢軍順治元年出爲山東青州知府初上官總兵官柯永盛以戍青州之兵徇高密而侍郎王熬永以招撫至主饗趙應元者從李自成爲旗鼓颯青州兵寡陽就熬永降請置孥於城旣入遂執殺熬永文衡見應

元爲好語具疏請留鎮應元喜擢庫金羣酌會梅勒額貢和託李率泰率禁旅
略登萊道青州營城西北文衡甚應元出謁和託等慰勞遣還密令兵從入夜
起戮應元及其黨數十人青州平二年移淮安府知府豫親王多鐸下揚州道
淮安文衡請禁將吏母擾市糗糧芻秣應期立辦三遷巡撫甘肅五年二月上
官逾月而逆米喇印之亂變未作喇印詭言要文衡造其家集議文衡行未至
賊環射殺之總兵劉良臣副將毛鎔潘雲騰游擊黃得成金印都司王之儁守
備胡大年李廷試李承澤陳九功皆死參將翟大有與戰沒於陳賊挾西甯道
副使林維造至北關搃殺之越日陷涼州戕西甯道參議張鵬翼賊四出侵掠
破鞏昌戕臨鞏兵備道李絮飛破岷州戕知州杜懋哲王札破蘭州戕同知趙
衝學知州趙狎訓導白旗國學錦破臨洮戕同知徐養奇破渭源戕知縣李涓
戰通渭圍子山知縣周盛時被創死事平皆贈卹如例

張存仁遼陽人明寧遠副將與總兵祖大壽同守大凌河天聰五年太宗自將
攻大凌河從大壽出降仍授副將六年正月存仁與副將張洪謨參將高光輝

游擊方獻可合疏請乘時進取參將姜新別疏請令副將祖可法劉天祿先取松杏二城則錦州自下七年五月新復請進兵洪謨等及新皆大凌河降將也崇德元年五月始設都察院班六部上以存仁爲承政並授世職一等梅勒章京越數日存仁上言臣自歸國默察諸臣賢否政事得失但不敢出位妄論列今上親立此官而以命臣臣而正直後之人正直必有過於臣者臣而邪佞後之人邪佞亦必有甚於臣者所慮臣本心而行事人不敢彈劾而臣彈劾之人不敢更張而臣更張之舉國必共攻臣使臣上無以報主恩下無以伸己志獲戾滋甚臣雖愚豈不知隨衆然諾其事甚易發姦擿伏其事甚難誠見不如此不足以盡職敢於受任之始瀝誠以請如臣苟且塞責畏首畏尾請以負君之罪殺臣如臣假公行私瞻顧情面請以欺君之罪殺臣如臣貪財受賄私家利己請以貪婪之罪殺臣苟臣無此三罪而奸邪誣陷亦願上申乾斷以儆讒嫉上曰此或知有其人而爲是言朕素不聽讒惟親見者始信之且朕志定於上而諸臣蒙澤於下縱有奸邪孰能售其術哉越數日以阿什達爾漢爲都察院

滿承政尼堪爲蒙古承政並增置祖可法爲漢承政上御清甯宮阿什達爾漢等前奏事上因諭曰朕有過親王以下壞法亂紀民左道惑衆皆當不時以聞若舉細而遺大非忠直也可法對曰臣等惟上是懼他復何忌有聞必以奏存仁曰可法言非是臣誠忠直爲國上前且犯顏直諫况他人乎上曰然人果正直天地鬼神不能搖動人主焉得而奪之是歲都察院劾刑部承政耶球貪汙論罪劾工部奪民居授降人復別造宅愼民勞民非制上以諸臣多未更事事事加罪反令惶惑但誠毋更違令三年正月可法存仁疏言禮部行考試令奴僕不得與上前歲試士奴僕有中式者別以人畀其主今忽更此制臣等竊謂奴僕宜令與試但限以十人爲額苟十人皆才何惜以十人易之上曰昔取遼東良民多爲奴僕朕令諸王下至民家皆察而出之復爲良民又許應試少通文藝拔爲儒生今滿洲家奴僕非先時濫占者比或有一二諸生非攻城破敵血戰而得卽以戰死被獲昨歲克皮島滿洲官兵爭効命漢官兵坐視不救此行所得之人苟無故奪之彼死戰之勞捐軀之義何忍棄也若別以人相易易

者無罪強令爲奴獨非人乎爾等但愛漢人不知惜滿洲有功將士及見易而爲奴者也可法存仁引罪謝既復論戶部承政韓大勳盜帑大勳坐奪職四月疏請敕戶部立四柱年冊再疏請誅大勳又劾吏部刑部復用職吏違旨壞法皆與可法合疏上上皆嘉納之三年更定官制可法存仁皆改都察院右參政漢軍旗制定隸鎮藍旗大壽既降復入錦州爲明守攻數年不克五年正月存仁疏請屯兵廣甯扼甯遠錦州門戶四月又疏言臣視今日情勢錦州所必爭但略地得利易圍城見功難願上振軍心與之堅持截彼調察禁我逃亡遠不過一歲近不過一月當有機可乘兵法全城爲上蓋貴得人得地不貴得空城也我師壓境彼必棄錦州保甯遠再急彼必棄甯遠保山海關大壽跋扈畏罪豈肯輕去其窟事緩則計持久事急則慮身家大壽背恩失信人皆以爲無顏再降臣深知其心無定惟便是圖急則悉置不顧况彼所持者蒙古耳今蒙古多幕化而來彼必疑而防之防之嚴則思離離則思變伏願以屯耕爲本務率精銳薄城顯檄蒙古縱俘宜諭未有不相率出降者此攻心之策得人得地之

術也十二月復言兵事時有形有勢三者變化無定而用之在人松山杏山塔山三城乃錦州之羽翼害遠之咽喉塔山城倚西山之麓自其巔發礮俯擊城易破也既得此城羽翼折咽喉塞矣兵法困堅城者必留其隙錦州雖不甚堅當留山海關以爲之隙錦州遼兵少西兵多一人負箭入羣驚而思遁能善用巧山海關可下疏未並言烏真超哈每遇番上輒令奴僕代上爲申禁六年師屢破明兵松山杏山間存仁復疏請相機度勢以時進兵七年既克錦州存仁請招吳三桂降上頒御劄撫諭並命存仁遺以私書略言明連將終重臣大帥就俘歸命將軍祖氏甥雖欲逃罪無以自明大厦將傾一木不能支縱苟延歲月智竭力窮終蹈舅氏故轍何若未困先降勳名俱重六月烏真超哈八旗始分置八固山授存仁鎮藍旗梅勒額真八年從鄭親王濟爾哈朗取前屯衛中後所加半個前程順治元年從入關與固山額真葉臣率師徇山西下府六州二十四縣一百三十一遂克太原又從豫親王多鐸略河南下江南督所部以礮戰屢有克捷二年六月從貝勒博洛定浙江以存仁領浙江總督兵後民

流亡存仁集士紳使撫諭民復其所七月疏言近有鬻髮之令民或假此號召爲逆若反形既著重勞大兵莫若速遣提學開科取士下令免積逋減額賦使讀書者希仕進力田者道追呼則莫肯相從爲逆矣得旨謂誠安民急務也令新定諸行省皆準恩詔施行十一月授兵部右侍郎兼都察院右副都御史總督浙江福建時明魯王以海保紹興號監國其將方國安鎮嚴州故明福王由嶽倚大學士馬士英用以亡國士英走依國安是歲九月國安自富陽渡錢塘江窺杭州存仁遣副將張杰王定國率師禦之斬四千餘級國安退保富陽又令定國出屯餘杭遇國安兵與戰自關頭至小嶺逐北二十里斬國安子士衍十月士英復以兵至去杭州十里爲壘五平南大將軍貝勒勒克德渾帥師赴之未至士英引去存仁與總兵官田雄追擊之斬五百餘級十一月士英國安復以兵至存仁與梅勒額真季什哈及雄等帥師擊之敵溺江死者無算十二月士英國安屯赭山掠朱橋范村諸處存仁與梅勒額真朱瑪喇及雄杰等分兵與戰國安所將水師數萬人殲焉餘衆俘馘殆盡三年二月有姚志卓者爲

亂於昌化與國安相應存仁遣杰等擊走志卓復昌化五月敘功進三等昂邦章京六月遣副將張國勳等破敵太湖獲士英等戮之十一月存仁請設水師五千備錢塘江禦海寇四年五月遣副將滿進忠等收福州鎮東衛破海寇周崔芝遣副將李繼援浦城逐崔芝黨岑本高十二月遣副將馬成龍等破敵處州克景宿雲和龍泉三縣五年正月明宜春王議衍率衆自江西入福建保汀州山寨總兵官于永紱擊破之二月分兵克連城順昌將樂三縣獲明侍郎趙士冕總兵黃鍾靈等存仁自至浙江屢以疾乞休至是始得請受代以去六年八月起授兵部尙書兼右副都御史總督直隸山東河南三行省巡撫保定諸府提督紫金諸關兼領海防盜發榆園爲大名諸縣害存仁聞歸德侯方域才貽書咨治盜策方域具以對存仁用其計盜悉平七年上令疆吏考校諸守令以文藝最高下存仁出按諸府縣廉能吏有一二語通曉卽注上考非然者文雖工亦乙之監司請其故存仁曰我武臣也上命我校文我第考實文有僞實難欺也况諸守令多從龍之士未嘗教之遽以文藝校短長不寒廉能吏心乎

屢遇恩詔進一等精奇尼哈番兼拖沙喇哈番九年卒贈太子太保諡忠勤祀直隸山東河南浙江福建五行省名宦乾隆初定封三等子存仁弟子瑞午康熙間爲福建邵武府知府耿精忠叛徇諸郡邑瑞午不爲下死之子玳瑛珍珠玳瑜子婦王李皆從死事定贈瑞午太僕寺卿存仁孫璠康熙間以佐領從軍鄭成功將劉國軒攻海澄戰死贈拖沙喇哈番

論曰國初諸大政皆定自太祖太宗朝世謂承疇實成之誣矣承疇再出經略江南湖廣以速溲黔皆所勘定桂王旣入緬甸不欲窮追以是罷兵柄孟喬芳撫綏隴右在當日瀕臣中樹績最烈張存仁通達公方洞達政本二人皆明將明世武臣未有改文秩任節鉞者而二人建樹顧如此資格固不足以限人歟抑所遭之時異也

清史稿

列傳二十五

蔣赫德

額色赫

車克

覺羅巴哈納

宋權

傅以漸

呂宮

成克鞏

金之俊

王永吉

黨崇雅

順治 高州 人

蔣赫德初名元恒遵化人天聰三年太宗伐明克遵化選儒生俊秀者入文館元恒與焉賜名赫德崇德元年授秘書院副理事官予四戶漢軍旗制定隸鎮白旗順治二年擢國史館學士九年朝鮮國王李滉奏國內外奸徒謀不軌已伏其辜命與侍郎伊勒都齋敕往慰問十一年擢國史院大學士十二年詔諸大臣陳時務疏言察吏乃可安民除害乃可興利今百姓大害莫甚於貪官蠹吏懲治之法惟恃督撫糾劾以其確知屬吏之賢不肖也近每見各督撫彈章

指事列欵贓跡累累及奉旨勘讞計贓科罪不及十之二三不曰事屬子虛則曰衙役作弊卽坐衙役者又多引雜犯律例聽其贖免何所懲憚而不肆行其志乎其始官胥朋比虐取瓜分事敗官嫁名於吏以覬然灰吏假資於官以成展脫究之官吏優游兩獲無恙糾劾難行竟成故事請嚴飭各督撫糾劾勘讞覆奏時必全述原參疏語某款不實或開報虛構或承問故縱窮源質訊是非不容並立實係衙役詐騙按律坐以應得之罪不許折贖則貪蠹清而民蘇矣得旨下所司嚴飭行旋加太子太保十五年改文華殿大學士兼禮部尙書十六年加少保命齋册封朝鮮國王李榻侍讀碩博輝副之蔣赫德屢充殿試讀卷官教習庶吉士修輯明史太宗實錄充副總裁太祖太宗聖訓充總裁譯三國志成賜鞍馬十七年引疾乞休康熙元年起爲弘文院大學士二年調國史院九年卒諡文肅蔣赫德初爲明諸生嘗應鄉試夜聞明遠樓鼓聲曰此頽敗之氣國安能久不終試而去徧游九邊曰王氣在遼瀋將有聖人出吾蓄才以待可也旋爲太宗賞拔卒致通顯

額色赫富察氏滿洲鎮白旗人世居納殷祖莽吉圖當太祖時從其兄孟古慎郭和來歸額色赫事太宗從征伐自巴牙喇壯達授兵部理事官天聰九年從梅勒額真巴奇蘭伐黑龍江部使還奏捷崇德三年擢秘書院學士五年睿親王多爾袞率師圍錦州命額色赫賚敕諭機宜會固山額真圖爾格敗明兵於木輪河使還奏捷六年命與圖爾格及大學士范文程剛林如錦州按諸將離城遠駐遣兵還家睿親王以下坐降罰有差明總督洪承疇以援師至上又命額色赫詣軍前授諸將方略還奏敵勢甚張當益兵上遂自將擊破明軍既克錦州又命宣諭慰撫祖大壽及同降諸將士八年從貝勒阿巴泰伐明略山東下兗州同甲喇額真穆成格等奏捷順治元年從入關授世職牛象章京加半箇前程五年遷刑部啟心郎八年擢國史院大學士世職累進一等阿達哈哈番十三年命往朝鮮讞獄十五年改保和殿大學士額色赫再主會試修太宗實錄輯太祖太宗聖訓纂資政要覽並充總裁官累加少師兼太子太師十八

年卒諡文恪

車克瓜爾佳氏滿洲鑲白旗人世居蘇完祖克爾素太祖時來歸父席爾那任牛叅額眞卒車克爾兼巴牙喇轄天聰八年從上伐明自大同趨懷遠薄左衛城與巴牙喇懋章京圖魯什等設伏敗明將曹文詔騎兵略代州至五臺山還遇明將祖大弼兵擊敗之三年授戶部副理事官承政韓大勳私取庫金事發車克坐貯庫時未記播論死命罰鍰以贖仍留部尋兼任甲喇額眞五年從鄭親王濟爾哈朗圍錦州令車克與噶布什賢噶喇依昂邦勞薩以三百人伏高橋北坐縱敵籍家財之半六年復從攻錦州擊破明總督洪承疇步兵順治元年從入關擊李自成授世職牛叅章京考績加半箇前程五年擢戶部侍郎從英親王阿濟格討姜瓖師下大同令車克授太原與巡撫祝世昌謀遣兵瓖瓖將劉遷萬煉等七年兼任正白旗滿洲梅勒額眞世職累進二等阿達哈哈番八年改都察院參政駐防河間佐領碩爾對訐戶部給餉不均事具巴哈納傳車克亦坐降世職拖沙喇哈番旋擢戶部尙書十年復世職十一年加太子太保十二年擢秘書院大學士進少保十三年復進少傅兼太子太傅領戶部尙

書十四年考滿加少師兼太子太師十六年命赴江南督造戰艦十七年命與安南將軍宗室羅託率師駐福建防鄭成功聖祖卽位召還調吏部尙書有阿那庫者與兄金布爭產上命均分之既又與本旗佐領吉魯爭言吉魯坐阿那庫違上旨牒戶部車克移刑部坐阿那庫罪絞阿那庫妻擊登聞鼓訟冤命覆勘車克當奪官命削加銜康熙元年復授秘書院大學士六年以疾乞休十年卒諡文端

覺羅巴哈納滿洲鎮白旗人景祖第三兄索長阿四世孫也年十七從軍佐太宗征伐有功天聰八年授世職牛叅章京九年命免功臣徭役分設牛叅巴哈納與焉崇德三年授刑部理事官四年擢參政兼正藍旗滿洲梅勒額眞七年以刑部勘將佐功罪失平奪世職順治元年擢正藍旗滿洲固山額眞與固山額眞石廷柱徇霸州滄州德州臨清皆下移師山西會固山額眞葉臣招降明總督李化熙等師自汾州趨平陽與廷柱擊破明兵至黑龍關降裨將三卒六千餘賚白金進世職三等甲喇章京三年從肅親王豪格下四川討張獻忠分

兵定遵義夔州茂州斬所置吏數百降卒數千盡得其馬騾輜重餘寇悉平師還以勘甲喇章京希爾根軍功失實又黜親王欲以機賽爲巴牙喇囊章京不當巴哈納與索渾未阻止且共爲奏議奪官命降世職拜他喇布勒哈番尋擢戶部尙書八年世祖親政巴哈納奏事舉上問民間疾苦及國家無益之費巴哈納舉臨清採販及通州五閘運漕二事以對上命卽永行停止尋兼正白旗滿洲固山額眞駐防河間牛叅額眞碩爾對訐告戶部發饟不均下法司鞫問部議巴哈納阿附睿親王厚白旗薄黃旗時方治睿親王獄坐巴哈納罪至死上命寬之削世職奪官籍其家三之二九年起授刑部尙書十一年同諸大臣分賑畿輔賜敕印以行累進少傅兼太子太傅十二年授弘文院大學士十五年改中和殿大學士十八年復設內三院又改秘書院大學士康熙元年兼鑲白旗滿洲固山額眞五年卒時繁拜擅政巴哈納與不治郵不行聖祖親政其子巴什以請贈少師兼太子太師設敏壯

宋權字元平河南商邱人明天啟五年進士官順天巡撫駐密雲受事甫三日

李自成陷京師權計殺自成將黃錠等眷親王師入關籍所部以降命巡撫如故權疏言舊主御宇十有七年宵衣旰食聲色玩好一無所嗜不幸有君無臣釀成大亂幸逢聖主殲亂復讐祭葬以禮倘蒙勅議廟號以光萬世則仁至義盡天下咸頌四海可傳檄而定明朝軍需浩繁致有加派有司假公濟私明徵外有暗徵公派外有私派民困已極請照萬歷初年爲正額其餘加增悉予蠲免勤求上理宜育賢才臣所知者如王永吉方大猷楊毓楫朱繼祚葉廷桂等均濟時舟楫准上召而用之得旨嘉納尋又薦寶坻進士杜立德等十一人時權仍駐密雲撫治二十餘州縣兼領軍事旋以遵化當衝要命權移駐先後擊降自成黨數千豐潤盜起權捕治以未獲其渠疏請罷斥溫旨慰留尋疏陳祖軍民壯之害言明制祖傳軍籍隸在營路選取民壯隸在州縣身故則勾子孫子孫絕則勾宗族宗族盡則勾戚屬流離逃竄亂由此階請特沛恩綸除茲秕政又有私刻順天巡撫印僞爲糾舉咨文投部者事覺速治權疏言用舍者君人之權黜陟者銓樞之政薦劾者撫按之職請飭各省撫按有關用舍大典必

具疏請不須以咨文從事則百弊俱清疏入並如所請著爲令故輔既平詔撥近京荒田及明貴戚內監廢莊盡爲旗地民田錯雜別給官田互易權疏言農民甫得易換之田廬舍無依耕種未備請蠲租三年又送疏請蠲薊州田租一年除密雲荒地逃丁派徵錢糧興三協屯政守兵一子田十畝俱下部議行有詔優恤綠旗陳亡兵家屬權請特遣部臣莅視散給俾霑實惠三年擢國史院大學士五年遭母喪請終制命如常入直私居持服六年假歸葬親尋加太子太保七年還朝時議用明例遣御史巡方權力持以爲不可八年條陳時政又言宜復設巡按給事中陳調元王廷諫等劾權前後持兩端且追劾其母喪未除入闈主試下部議權老病宜罷歸遂命致仕九年卒部議權被論致仕祭葬宜殺禮上以權誅自成黨有功賜祭葬如例贈少保兼太子太保諡文康子華自有傳

傅以漸字于磐山東聊城人順治三年一甲一名進士授弘文院修撰八年遷國史院侍講九年遷左庶子十年歷秘書院侍講學士少詹事擢國史院學士

十一年授秘書院大學士十二年詔陳時務條上安民三事加太子太保改國史院大學士先後充明史太宗實錄纂修太祖太宗聖訓並通鑑總裁又命作資政要覽後序撰內則衍義覆核賦役全書十四年命以漸及庶子曹本榮修易經通注十五年借學士李蔚主會試考官入闈例得携書籍言官請申禁以漸請仍如舊例許之入闈病咯血請另簡命力疾料理尋加少保改武英殿大學士兼兵部尙書旋乞假還里累疏乞休十八年解任康熙四年卒

呂宮字長晉江南武進人順治四年一甲一名進士授秘書院修撰九年加右中允十年二月上幸內院召宮與侍講法若真編修程芳朝黃機命撰柳下惠不以三公易其介論宮論有曰伊周衛霍爭介不介上喜曰此三公語列第一尋諭吏部翰林升轉舊例論資俸亦論才品呂宮文章簡明氣度閑雅遇學士員缺卽行推補尋授秘書院學士閏六月遷吏部侍郎十二月超授宏文院大學士言官請禁江浙簽富戶運白糧並織造報充機戶部議已有例禁宮復請嚴飭督撫察究大學士陳名夏得罪十一年給事中王士禎御史王秉乾劾宮

爲名夏黨宮引罪乞罷上命省改初平西王吳三桂專鎮漸跋扈宮與名夏及大學士馮銓成克鞏薦御史郝浴命巡按四川至是浴露章劾三桂三桂疏辨上爲罷浴宮與銓克鞏皆坐誤舉鑄二級留任宮以病乞假上遣醫療治問病狀疏言乞假已三月稟體怯弱人道俱絕僅能僵臥兀坐乞寬期調治御史姜圖南劾疏語褻嫚楊義復劾其曠職宮亦累疏乞罷十二年以修資政要覽書成加太子太保宮復疏申請賜貂裘蟒緞鞍馬命馳驛回籍俟病痊召用十三年敕存問賜羊酒十七年詔大學士尙書自陳宮不具疏左都御史魏裔介劾宮一病六年聞問杳然忘君負恩上以宮請告無自陳例諭母苛求十八年世祖崩宮赴都哭臨病益殆還里康熙三年卒

成克鞏字子固直隸大名入父基命明大學士克鞏崇禎十六年進士改庶吉士避亂里居順治二年以左庶子李若琳薦授國史院檢討五年遷秘書院侍讀學士尋擢弘文院學士九年遷吏部侍郎十年擢本部尙書疏言臣部四司分省設官原以諮訪本省官評請令各司人注一簿詳列本省各官賢否參以

撫按舉劾備要缺推選督撫舊無考成請令疏列事蹟消弭盜賊開墾荒田清理錢糧糾除貪悍定爲四則以別賞罰文選推陞榮從掣籤但地方繁簡衝僻不同如江南蘇松等郡積弊之區非初任邑令所能振刷請取卓異官或陞或調通融補授行之有效即加優擢亦於選法無礙章下所司尋擢秘書院大學士以薦御史郝浴失人鑄二級十二年命還所降級十二年加太子太保左都御史缺員命克鞏暫攝並諭俟得其人仍回內院疏言用人爲治平之急務而大僚尤重今通政使李日芳甘肅巡撫周文葉陝西巡撫陳極新皆衰老昏庸亟當更易財用困乏宜定丈量編審之期學校冒濫宜嚴考貢入學之額任樞密者遇封疆失事不得借行查以滋推諉司刑憲者於棍徒詐害不得寬反坐以長刁風又若修築河工宜嚴冒銷杜侵帑此數事皆當振刷以圖實政上深惡之給事中孫光祀劾左通政吳達兄達叛逆下法司勘擬克鞏疏論左都御史龔鼎孳與達同鄉徇隱不舉鼎孳疏辨不知達爲達弟坐奪俸尋命克鞏回內院十五年加少保改保和殿大學士兼戶部尙書十六年加少傅兼太子太

傅十七年遵例自陳論不必求罷部推浙江布政參議李昌祚擢大理寺少卿先是揚州亂民李之春事發其黨亦有名李昌祚者克鞏與大學士劉正宗稟擬未陳明又在吏部時薦周亮工擢至福建布政使坐贓敗克鞏疏引罪左都御史魏裔介劾正宗語連克鞏並及昌祚亮工事克鞏疏辨上責其巧飾下王大臣議罪當奪官世祖初以克鞏世家子知故事不次擢用值講筵命內臣將畫工就邸舍圖其象以進居常或中夜出片紙作國書詢時事克鞏占對惟謹至是論責其依違附和凡事因人仍寬之命任事如故十八年聖祖卽位復爲國史院大學士康熙元年調秘書院大學士二年乞休回籍克鞏送主鄉會試稱得士湯斌馬世俊張玉書嚴我斯梁化鳳等皆出其門歷充太宗實錄太祖太宗聖訓總裁屢得優賞二十六年太皇太后崩赴臨三十年卒年八十四子亮編修光武昌守道

金之俊字豈凡江南吳江人明萬曆四十七年進士官至兵部侍郎睿親王定京師命仍故官疏請先蠲畿甸田租以慰民望又言土寇率衆降者宜赦罪勿

論轉渠來獻分別叙功就撫之衆宜編保甲令安故業無恒產者別爲區畫尋
奏薦丁魁楚丁啟睿線國安房可壯左懋泰郝綱等又勅通州道鄭輝優游養
寇三關總兵郝之泗縱兵肆掠俱宜罷斥並請趣畿南北巡按及監司以下官
赴任禁止滿洲官役額外需索驛遞夫馬疏入皆採行二年以京師米貴疏言
大兵直取江南應令漕督及巡漕御史赴任金陵底定舉行漕政詔速議行因
復上漕政八事疏下所司尋調吏部侍郎三年疏請酌定進士銓選之制五年
擢工部尙書六年乞假歸加太子太保七年還朝八年調兵部加少保兼太子
太保十年調左都御史疏言審擬盜犯請用正律不宜概行籍沒致累無辜又
疏言直省提學例以僉事道分遣畿輔爲首善之區江南人才之會請以翰林
官簡用均報可尋遷吏部尙書授國史院大學士十二年之俊病乞休上不允
遣畫工就邸畫其象十三年諭諸大臣曰君臣之義終始相維爾等今後毋以
引年請歸爲念爾等豈忍違朕朕亦何忍使爾等告歸昨歲之俊病甚朕遣人
圖其容念彼已老惟恐不復相見不勝眷戀朕簡用之人欲皓首相依不忍離

也之俊泣謝十五年改中和殿大學士兼吏部尚書同校定律例十六年詔立明莊烈帝碑命之俊撰文尋加太保兼太子太師復乞假歸十七年自陳乞罷溫諭敦召未至加太傅十八年復改秘書院大學士之俊自歸後屢以衰老乞休康熙元年始允致仕之俊家居有爲匿名帖榜其門以謗之者之俊白總督耶廷佐窮治之牽累不決事聞上不直所爲以律禁收審匿名帖鏤廷佐二級之俊削太傅銜九年卒諡文通謝陞山東德州人明萬曆三十五年進士官至建極殿大學士兼吏部尚書加少保兼太子太保崇禎之季明帝欲與我議和陞洩其語罷歸里李自成入京師陞與明御史趙繼鼎盧世淮逐自成所置吏奉明宗室香河知縣師欽城守尋奉表來歸授師欽知州命陞以建極殿大學士管吏部尚書陞至京師改命與諸大學士共理機務二年卒贈太傅諡清義胡世安四川井研人明崇禎元年進士官至少詹事順治初授原官四遷禮部尚書十五年授武英殿大學士兼兵部尚書聖祖即位與之俊同改祕書院大學士以疾乞休累加少師兼太子太師康熙二年卒

王永吉字修之江南高郵人明天啓間進士官至薊遼總督順治二年以順天巡撫宋權薦授大理寺卿四年擢工部侍郎永吉疏辭上責其博虛名特允之並諭永不錄用居數年有詔起用廢員復詣京師吏部疏薦八年授戶部侍郎條奏各衛所屯地分上中下三等請撥上田給運丁各項抵色銀請仍令官收官解本色物料動支折價採買洲田丈量累民請以蘆課并入州縣考成五年一次丈量皆見採擇永吉家居究心黃河下游闕壘爲害嘗議修涇河閘濬射陽湖九年疏言黃水自邳宿下至清河口淮泗之水衆於洪澤湖亦出清河口二水交會淮泗弱勢不能敵黃折而南趨四百餘里出瓜洲儀真方能達江一線連河收束甚緊即有大小閘洞宣洩海口不開下流壅滯以致河隄十年九決海口在興化泰州鹽城境內輒爲附近居民填塞乞敕河漕重臣相度疏濬復其故道淮泗消則黃河勢亦減時河以北諸省患水而江以南又苦旱屢詔蠲賑而湖廣四川閩廣諸鎮待饟甚急永吉疏請下廷臣籌足餉救荒之策上命永吉詳具以聞永吉因言各省兵有罪革占冒馬亦有老病弱斃十汰其二

以百萬之餉計之歲可省二十萬即以裁省之項酌定直省災傷分數則兵清而賦亦減上嘉納之畿輔姦民每藉投充旗下橫行仇法永吉疏陳其害謂上千國法下失人心請敕禁王大臣濫收人投旗以息諸弊十年擢兵部尙書十一年與刑部尙書覺羅巴哈納等分賑直隸八府轉都察院左都御史擢祕書院大學士永吉在兵部勸德州諸生呂煜匿逃人行賄讞未當下王大臣詰問永吉厲聲爭辨事上聞諭曰永吉破格超擢當竭力爲國乃因詰問輒至忿怒豈欲效陳名夏故態耶左授倉場侍郎十二年仍授國史院大學士尋加太子太保領吏部尙書十四年夏旱疏請下直省督撫按諸臣清釐庶獄如有殊常枉屈奏請上裁贖徒以下保釋寧家下所司議行旋以地震具疏引咎上復責其博虛名十五年以兄子樹德科場關節事發左授太常寺少卿遷左副都御史十六年卒上以永吉勤勞素著命予優恤贈少保兼太子太保吏部尙書諡

文通

黨崇雅陝西寶鷄人明天啓五年進士官至戶部侍郎順治元年以天津總督

駱養性薦授原官調刑部疏言舊制大逆大盜決不待時餘俱監候秋後處決未嘗一罹死刑輒棄於市請凡罪人照例區別以昭欽恤新制未定并乞暫用明律俟新例頒行畫一遵守二年復疏言流寇暴虐今勦滅殆盡恐寇黨株連下民未獲寧止請速頒恩赦督撫司道及府州縣各官簡用務在得人庶可廣皇仁布實政並得旨允行駱養性被訐貪婪通賊辭連崇雅讞不實免議給事中莊憲祖劾崇雅衰庸崇雅疏乞罷留之五年擢尙書六年加太子太保八年調戶部加少保十年引疾告歸命仍支原俸旋召還十一年授國史院大學士十三年復以老乞休加少傅兼太子太傅入謝上見其老賜御服諭曰卿今還里服朕賜衣如見朕也臨行復召見賜茶慰以溫語命大學士車克送之十三年敕存問康熙五年卒明福王時定從賊案崇雅與衛周祚高爾儼皆與衛周祚山西曲沃人明崇禎進士官戶部郎中順治元年授吏部郎中再遷刑部侍郎疏言各省逮捕土寇坐輒數十人請飭鞫訊得實具獄詞解部京師多訐訟請嚴反坐罪功臣犯法請復收贖之令調吏部疏言六部司屬請每歲令堂官

糾舉黜陟疆圉新闢招民百名卽授知縣暫委各官卽予本職乃一時權宜計請試以文義有不嫻者招民改武職暫委授佐雜皆下部議行擢尙書歷工吏二部十五年授文淵閣大學士兼刑部尙書改國史院以堇兄周胤乞假還復起授保和殿大學士兼戶部尙書以疾乞休十四年卒諡文清周祚居鄉謹厚聖祖稱之西巡遣大臣醑其幕周胤明崇禎七年進士官御史順治初授原官官至兵部侍郎高爾儼直隸靜海人明崇禎十二年進士官編修順治初授祕書院侍講學士遷侍郎歷禮吏二部擢吏部尙書加太子太保九年爲御史吳達所論乞罷旋起補弘文院大學士十二年卒贈少保諡文端張端山東掖縣人父忻明天啟五年進士官至刑部尙書端明崇禎十六年進士改庶吉士李自成入京師端從忻皆降順治初忻以養性薦授天津巡撫端亦以薦授弘文院檢討三遷爲禮部侍郎十年授國史院大學士十一年卒贈太子太宗諡文安忻以靜海土寇亂罷後端卒養性崇禎時官錦衣衛都指揮使頗用事大學士吳甞成周延儒死皆有力來降授總督尋坐事罷仍加太子太傅左都督進

太子太師求自效授浙江掌印都司卒

論曰世祖既親政銳意求治諸臣在相位宜有闕規碩畫足以輔新運者如蔣赫德請懲貪蠹權首請田賦循萬厯舊額並罷祖軍民壯永吉讓清兵額卹災傷痛陳投旗之害之俊崇雅鄭重斷獄可謂能舉其大矣若巴哈納以細事察明問以漸宮以媿科虛特擢及額色赫車克輩皆鮮所建白要其謹身奉上亦一代風氣所由始也